


書叢本基學國

義本子老

撰源魏

公用圖書
愛惜使用



行發館書印務商

舊

書叢本基學國

老 子 本 義

魏 源 撰

空軍軍官學校圖書館

登記號

00 835

類

號

120.3.31

2231

商務印書館發行

空軍軍官學校圖書館

國家圖書館典藏

由國家圖書館數位化

論老子

一

文景曹參之學。豈深於嵇阮王何乎。而西漢西晉燕越焉。則晉人以莊爲老。而漢人以老爲老也。豈獨莊然。解老自韓非下千百家。老子不復生。誰定之。彼皆執其一言而闕諸五千言者也。取予翕關。何與無爲清靜。芻狗萬物。何與慈救慈衛。玄牝久視。何與後身外身。泥其一而誣其全。則五千言如耳目口鼻之不能相通。夫不得言之宗。事之君。而徒尋聲逐景於其末。豈易知易行。而卒莫之知且行。以至於今泯泯也。老子曰。有之以爲利。無之以爲用。非不知有無之不可離。然以有之爲利。天下知之。而無之爲用。天下不知。故恆託指於無名。藏用於不見。損之又損。以至於無爲。無爲之道。必自無欲始也。諸子不能無欲。而第慕其無爲。於是陰靜堅忍。適以深其機。而濟其欲。莊周無欲矣。而不知其用之柔也。列子致柔矣。而不知無之不離乎有也。故莊列離用以爲體。而體非其體。申韓鬼谷范蠡離體以爲用。而用非其用。則盍返其本矣。本何也。卽所謂宗與君也。於萬物爲母。於人爲嬰兒。於天下爲百谷王。於世爲太古。於用爲雌爲下。



爲玄。故如蓋公、黃石之徒，斂之一身，而微妙渾然，則在我之身已羲皇矣。卽推之世而去，甚去奢，化羸秦，酷烈爲文，景刑措，亦不啻後世羲皇矣。豈若刑名清談，長生之小用，而小弊大用，而大弊邪？吾人視嬰兒如昨日也，萬物之於母，無一日離也。百谷於其王，未嘗一日離也。動極必靜，上極必下，躍極必晦，誠如此，則無一物不歸其本，無一日不有太古也。求吾本心於五千言而得，求五千言於吾本心而無不得，百變不離宗，又安事支離求之乎？反本則無欲，無欲則致柔，故無爲而無不爲，以是讀太古書，庶幾哉，庶幾哉。

二

老子道太古道，書太古書也。曷徵乎？徵諸柱下史也。國史掌三皇五帝之書，故左史在楚，能讀墳索，尼山適周，亦問老聃。今考老子書，谷神不死章，列子引爲黃帝書，而或以五千言皆容成氏書。至經中稱古之所謂，稱建言有之，稱聖人云，稱用兵有言，故班固謂道家出古史官，莊周亦謂古之道術有在於是者。關尹老聃聞其風而悅之，斯述而不作之明徵哉。孔子觀周廟而嘉金人之銘，其言如出老氏之口。考皇覽金匱，則金人三緘銘，卽漢志黃帝六銘之一，爲黃老源流所自。藏室柱史，多識擇取，學焉而得其性之所近，故其書如喪禮處戰勝之義，皆深知禮意，而又有失道德而後仁義，而後禮之言，則知吏隱靜觀，深疾末世用禮之失，疾之甚，則思古益篤，思之篤，則求之益深，懷德抱道，白首而後著書，其意不返斯世於太古淳樸不止也。氣化遞嬗，如寒暑然，太古之不能不唐虞三代，唐虞三代之不能不後世，一家高曾祖父。

乎姓。有不能同。故忠質文皆遞以救弊。而弊極則將復返其初。孔子寧儉毋奢。爲禮之本。欲以忠質救文。勝是老子淳樸忠信之教。不可謂非其時。而啓西漢先機也。然刪書斷自唐虞。而老子專述皇墳以上。夫相去太遠者。則勢常若相反。故論常過高。乃其學固然。非故激而出於此也。河上公曰。老子言我有三寶。一慈。二儉。三不敢爲天下先。慈非仁乎。儉非義乎。不敢先非禮乎。易曰。德言盛。禮言恭。又曰。昔吾有先正。其言明且清。老子有焉。然則太古之道。徒無用於世乎。抑世可太古而人不之用乎。曰。聖人經世之書。而老子救世書也。使生成周比戶可封之時。則亦嘿爾已矣。自非然者。去甚去奢去泰之旨。必有時而信於天下。夫治始黃帝。成於堯。備於三代。殲於秦。迨漢氣運再造。民脫水火。登衽席。亦不啻太古矣。則曹參文景。斷珣爲樸。網漏吞舟。而天下化之。蓋毒痛乎秦。酷劑峻攻乎項。一旦清涼和解之。漸進飲食而勿藥自愈。蓋病因藥發者。則不藥亦得中醫。與至人無病之說。勢易而道同也。孰謂末世與太古如夢覺不相入乎。今夫赤子乳哺時。知識未開。呵禁無用。此太古之無爲也。逮長天真未漓。則無竇以嗜欲。無芽其機智。此中古之無爲也。及有過而漸喻之。感悟之。無迫束以決裂。此末世之無爲也。時不同。無爲亦不同。而太古心未嘗一日廢。夫豈形如木偶而化馳若神哉。老氏書賅古今。通上下。上焉者羲皇關尹治之以明道。中焉者良參文景治之以濟世。下焉者明太祖誦民不畏死而心滅。宋太祖聞佳兵不祥之戒而動色。是也。儒者自益亦然。深見深淺。見淺。余不能有得於道而使氣焉。故貪其對治而三復也。

三

嗚呼。道一而已。老氏出而二。諸子百家出而且百。天下果有不一之道乎。老氏徒惟關尹具體而微。無得而稱焉。傳之列禦寇。楊朱莊周。爲虛無之學。爲爲我之學。爲放曠之學。列子虛無。釋氏近之。然性冲。悵遂未嘗貴我賤物。自高詆聖。誣愚自是。固亦無惡天下。楊朱而刑名宗之。莊周而晉人宗之。入主出奴。罔外二派。夫楊子爲我。宗無爲也。莊子放蕩。宗自然也。豈自然不可治身。無爲不可治天下哉。老之自然。從虛極靜篤中。得其體之至嚴至密者。以爲本。欲靜不欲躁。欲重不欲輕。欲嗇不欲豐。容勝苛。畏勝肆。要勝煩。故於事恆因而不倡。迫而後動。不先事而爲。夫是之謂自然也。豈滉蕩爲自然乎。其無爲治天下。非治之而不治。乃不治以治之也。功惟不居。故不去。名惟不爭。故莫爭。圖難於易。故終無難。不貴難得之貨。而非棄有用於地也。兵不得已用之。未嘗不用兵也。去甚去奢去泰。非並常事去之也。治大國若烹小鮮。但不傷之。卽所保全之也。以退爲進。以勝爲不美。以無用爲用。孰謂無爲不足治天下乎。老子言絕仁棄義。而不忍不敢。意未嘗不行其間。莊周乃以徜徉玩世。薄勢利。遂訶帝王。厭禮法。則盜聖人。至於魏晉之士。其無欲又不及周。且不知無爲治天下者果如何也。意糠粃一切。拱手不事事而治乎。卒之王綱解紐。而萬事瓦裂。刑名者流。因欲督責行之。萬物一付諸法。而已得清淨而治。於是不禁己欲而禁人之欲。不勇於不敢而勇於敢。不忍於不忍而忍於忍。煦煦子子之仁義退。而涼薄之道德進。豈盡老子道乎。豈盡非老

子道乎。黃老靜觀萬物之變。而得其闔闢之樞。惟逆而忍之。靜勝動。牝制牡。柔勝剛。欲上先下。知雄守雌。外其身而身存。無私故能成其私。所謂反者道之動。弱者道之用也。後人以急功利之心。求無欲之體。不可得。而徒得其相反之機。以乘其心之過不及。欲不偏不弊得乎。老子兢兢乎不敢先人。不忍傷人。而學者徒得其過高過激。樂其易簡直捷。而內實決裂以從己。則所見之乖謬使然也。莊子天下篇。自命天人。而處真人至人之上。韓非解老。而又斥恬澹之學。恍惚之言。爲無用之教。豈斤斤守老氏學者哉。漢人學黃老者。蓋公曹參汲黯爲用世之學。疏廣劉德爲知足之學。四皓爲隱退之學。子房猶龍。出入三者。體用從容。漢宣始承黃老。濟以申韓。其謂王伯雜用。亦謂黃老王而申韓伯也。惟孔明澹泊寧靜。法制嚴平。似黃老非黃老。手寫申韓教後主。而實非申韓。嗚呼。甘酸辛苦味不同。蘄於適口。藥無偏勝。對症爲功。在人用之而已。內聖外王之學。闇而不明。百家又往而不返。五穀羹稗。同歸無成。悲夫。知以不忍不敢爲學。則仁義之實行其間焉可也。

四

老子與儒合乎。曰否否。天地之道。一陽一陰。而聖人之道。恆以扶陽抑陰爲事。其學無欲則剛。是以乾道純陽。剛健中正。而後足以綱維三才。主張皇極。老子主柔賓剛。而取牝取雌。取母。取水之善下。其體用皆出於陰。陰之道雖柔。而其機則殺。故學之而善者則清淨慈祥。不善者則深刻堅忍。而兵謀權術宗之。雖

非其本真而亦勢所必至也。老子與佛合乎。曰否否。窈冥恍惚中有精有物。卽所謂雌與母。在佛家謂之玩弄光景。不離識神。未得歸於真寂海。何則。老明生而釋明死也。老用世而佛出世也。老中國上古之道。而佛六合以外之教也。故近禪者惟列禦寇氏。而老子固與禪不相入也。宋以來禪悅之士。類多援老入佛。經云民不畏威。大威至矣。蘇子由乃謂人苟於死生得喪之妄見。坦然無所怖畏。則吾性中光明廣大之大威。赫然見於前矣。何異指鹿爲馬。種黍生稗。尊老誣老。援佛謗佛。合之兩傷。何如離之兩美乎。河上公注不見漢志。隋始有之。唐劉知幾卽斥其妄。所分八十一章。與嚴君平道德指歸所分七十二章。王弼舊本所分七十九章。皆大同小異。又谷神子以曲則全。章末十七字爲後章之首。唐君相以絕學無憂。繫上章之末。訖元吳氏澄。近日姚氏鼎。又各以意合并之。而姚最舛矣。史遷統言著書五千餘言。而妄人或盡剪語詞。以就五千之數。傅奕定本又多增浮文。王弼稱佳兵不祥章。多後人之言。傅奕謂常善救人。四語獨見諸河上之本。韓非最古。而所引恆遜於淮南。開元御注。而贅文臆加於食母。其他滴玄酒和太羹者。何可勝道。矧夫流沙西去之誕。燕齊迂怪之譚哉。著其是。舍其非。原其本。析其歧。庶竊比於述而好古者。

史記老子列傳

老子者楚苦縣厲鄉曲仁里人也。

莊子稱孔子揚朱皆南之沛見老子。邊韶碑則稱老子楚相縣人。釋文引莊子注老子陳國相人。今屬苦縣。與沛相近。水經注陰溝篇東南至沛為澗水。澗水又東逕苦縣故城南。即春秋之相王莽更之為賴陵。又東逕賴鄉城南。又北逕老子廟東。又屈東逕相縣故城南。相縣虛荒。今屬苦縣。故城猶老子生於曲澗。間云云。尤為詳備。賴屬音之轉也。曲澗間即曲名耳。字聯。姓李氏。姚鼐曰。此據後漢書桓帝紀注引史記原文如此也。俗本字伯陽。證曰。聯蓋仁里也。

史記曰。字聯。河上公曰。字伯陽。張守節正義云。聯耳。漫無輪也。疑老子耳。漫無輪。故名耳。字聯云云。是唐初本猶未改也。孔子舉所嚴事之賢士大夫。皆稱氏字。晏平仲。蘧伯玉。老聃。子產。是也。匹夫無識。聯又非謚法。其妄無疑。莊子稱老子居沛。夫沛者宋地。而宋國有老氏。然則老子其沛人。子姓。子之轉為李。猶奴之轉為弋。歟。彭城近沛。意聯常居之。故曰老子。彭猶展禽。稱柳下邪。然則邢昺疏稱老子彭。即老子非無因也。

周守藏室之史也。孔子適周。將問禮於老子。老子曰。子所言者。其人與骨皆已朽矣。獨其言在耳。且君子得其時則駕。不得其時則蓬累而行。吾聞之。良賈深藏若虛。君子盛德。容貌若愚。去子之驕氣。與多欲。態色與淫志。是皆無益於子之身。吾所以告子。若是而已。孔子去。謂弟子曰。鳥吾知其能飛。魚吾知其能游。獸吾知其能走。走者可以為罔。游者可以為綸。飛者可以為矰。至於龍。吾不能知其乘風雲而上天。吾今日見老子。其猶龍邪。

朱子曰。或謂老彭即老子。余嘗亦疑此。以曾子問中言禮數。段證之。即述而不作。信而寓規之之意。老子知之。故言去子之驕氣云云也。不然。孔子方虛心請教。何驕之有乎。老子修道德。其學以自隱無名為務。居周久之。見周之衰。乃遂去。至關。關令尹喜曰。子將隱矣。彊為我著書。於是老子乃

老子傳之。列子引黃帝書。即谷神不死。章也。陳潢曰。孔子問禮於老聃。必是於問之中。老子修道德。其學以自隱無名為務。居周久之。見周之衰。乃遂去。至關。關令尹喜曰。子將隱矣。彊為我著書。於是老子乃

著書上下篇言道德之意五千餘言而去莫知其所終漢書揚雄傳言老聃著虛無之言兩篇即史記所

子為經勅朝野通習而唐明皇御注又分道經德經之名河上公八十一章注則又各立篇名皆臆造非

古故今惟分上篇下篇及第幾章以復其舊其字句之異則釋文已謂老子本衆多乖杜光庭謂後人或

盡刪語詞以就五千之數今尤不可不審擇也或曰老萊子亦楚人也著書十五篇言道家之用與孔子同時云蓋老子百有六

十餘歲或言二百餘歲以其修導而養壽也漢書藝文志道家老萊子行年七十為嬰兒以娛親而莊子則

云老萊子出薪遇仲尼謂曰去汝躬矜與汝容知斯為君子矣而國策客謂黃齊亦云公不聞老萊子之

教孔子事君乎示之以齒之堅也六十而盡相靡也與老子言行殊相溷史記仲尼弟子列傳云孔子之

所嚴事於周則老子於楚則老萊子則是判然二人皆與孔子同時左傳自孔子死之後百二十九年而

有萊駒是萊氏而稱老猶列禦寇師老商氏皆有道壽考之士所稱也

史記周太史儋見秦獻公曰始秦與周合而離離五百歲而後合合七十歲而伯王者出焉或曰儋即老

子或曰非也世莫知其然否畢沅曰古聃儋字通說文聃耳曼也又云瞻耳垂也又云聃耳大垂也聃義

呂覽老聃作老聃皆其明證鄭康成老子隱君子也老子之子名宗宗為魏將封於段干宗子注注子宮

曰老聃古壽考之號斯為通論矣

宮玄孫假仕於漢孝文師而假之子解為膠西王卬太傅因家於齊焉史記考證曰漢武惑於神仙方士

其子孫以明老子亦人耳非所謂乘雲氣御飛龍不可方物者也故一則曰隱君子再則曰隱君子良史

心苦矣張守節注翻引神仙荒唐悠謬之論所謂夏蟲不可語冰者乎黃氏日鈔曰道家謂黃帝上天老

子西出關為長生不死之證然黃帝之墓好道之漢武世之學老子者則絀儒學儒學亦絀老子道不同

親經之老聃之死學道之莊周親載之又何以稱焉

不相為謀豈謂是邪李耳無為自化清靜自正黃帝治效莫著於漢世故史遷舉老子我無為而民自

莊子天下篇曰以本為精以物為粗以有積為不足愴然獨與神明居古之道術有在於是者關尹老

聃聞其風而說之。建之以常無有。主之以太一。以濡弱謙下爲表。以空虛不毀萬物爲實。關尹曰。在己無居。形物自著。其動若水。其靜若鏡。其應若響。芴乎若忘。寂乎若清。同焉者和。得焉者失。未嘗先人而常隨人。老聃曰。知其雄。守其雌。爲天下谿。知其白。守其黑。爲天下式。人皆取先。己獨取後。曰。受天下之垢。人皆取實。己獨取虛。無藏也。故有餘。歸然而有餘。其行身也徐而不費。無爲也而笑巧。人皆求福。己獨曲全。曰。苟免於咎。以深爲根。以約爲紀。曰。堅則毀矣。銳則挫矣。常寬容於物。不削於人。可謂至極。關尹老聃乎。古之博大真人哉。

老子本義

上篇

道可道，非常道。名可名，非常名。無名，天地之始。有名，萬物之母。故常無欲，以觀其妙；常有欲，以觀其微。此兩者同出而異名，同謂之玄。玄之又玄，衆妙之門。

無名無欲四句，司馬溫公王安石蘇轍皆以有無爲讀。河上公諸家皆以名字歡字爲讀。丁氏易東曰：老子曰：道常無名，始制有名，則上二句以有無爲讀者非也。下二句或授莊子云：建之以常無有，正指老子此語。然老又云常無欲可名於小，是又不當以莊例老也。陳景元吳澄皆以此兩者同爲句，亦通。

至人無名，懷真韜晦，而未嘗語人，非祕而不宣也。道固未可以言語顯，而名迹求者也。及迫關尹之請，不得已著書，故鄭重於發言之首，曰：道至難言也，使可擬議而指名，則有一定之義，而非無往不在之真常矣。非真常者而執以爲道，則言仁而害仁，尙義而害義，襲禮而害禮，煦煦子子，詐僞之習出，而所謂道者弊，而安可常乎？老子言道，必曰常，曰玄，蓋道無而已。真常者，指其無之實，而元妙則贊其常之無也。老子見學術日歧，滯有溺迹，思以真常不弊之道救之，故首戒人執言說名迹以爲道，恐其無所警識，因以天地萬物之理指示之，猶恐其不親切也。復卽人心無欲有欲時返觀之，又恐其歧有無爲二也。而後以同謂之玄，渾徼於妙，總括之。凡書中所言道體者，皆觀其妙也。凡言應事者，皆觀其徼也。

惟夫心融神化。與道為一。而至於玄之又玄。則衆微之間。無非衆妙。凡言守雌。言不爭。言慈儉。言柔弱。種種衆妙。皆從此常無中出矣。故曰衆妙之門。蓋可道可名者。五千言之所具也。其不可言傳者。則在體道者之心得焉耳。全書大旨。總括於此。所謂言有宗。事有君也。吳氏澄曰。首章總言道德二字之旨。無名者道也。有名者德也。老子之意。蓋以虛無為天地之所由。以為天地者。莊子所謂建之以常無有也。以氣化為萬物之所得。以為萬物者。莊子所謂主之以太一也。故其道其德。以虛無自然為體。柔弱不盈為用。觀妙之妙。道也。妙之一本者。衆妙之妙。德也。妙之散殊者。焦氏竑曰。欲猶樂記感於物而動性之欲也。之欲。微。讀如邊微之微。言物之盡處也。晏子云。微者德之歸。列子云。死者德之微。皆指盡處而言。蓋無欲之為無。不待言。惟方其有欲之時。人皆指以為有。然有欲必有盡。則復歸於無矣。斯與妙何以異哉。故曰此兩者同謂之玄。此蓋不得已為未悟者言耳。故曰玄之又玄。衆妙之門。蘇氏轍曰。凡遠而無所至極者。其色必玄。故老子嘗以玄寄極也。

右第一章

天下皆知美之為美。斯惡已。兩已。蘇本作矣。皆知善之為善。斯不善已。劉驥本。此句上亦有天下字。故有無相生。顧歡及龍興碑本無故字。

傳奕本。六相字上並有之字。難易相成。長短相形。王弼本。形作較。與傾韻不協。高下相傾。音聲相和。前後相隨。是以聖人處無為之

事。行不言之教。萬物作焉而不辭。陸希聲及御覽引皆無焉字。傳及碑本作而不為始。畢沅謂辭始聲通。以此致異。生而不有。為而不恃。功成而

不居。夫惟不居，是以不去。傳奕兩居字並作處。河上公作弗居。末三句從淮南子。

此明首章常名無名之旨也。蓋至美無美，至善無善。苟美善而使天下皆知其為美善，則將相與市之託之，而不可常矣。此亦猶有無難易長短高下音聲前後之類。然當其時適其情，則天下謂之美善，不當其時，不適其情，則天下謂之惡與不善。聖人知有名者之不可常，是故終日為而未嘗為，終日言而未嘗言。豈自知其為美為善哉？斯則觀微而得妙也。若然者，萬物之來雖亦未嘗不因應而生，不有為不恃，終不居其名矣。夫有名之美善，每與所對者相與往來興廢，以其有居則有去也。苟在己無居，夫將安去？此乃無為不言之美善，無與為對，何至於美斯惡，善斯不善哉？斯真所謂常善也。作焉不辭，碑本作作而不為始，義正相備，蓋萬物作焉而後應之不辭耳。此因應無為之道也。吳氏澄釋為言詞之詞，謂天何言哉。姚氏鼐謂作使也，以身為萬物使而不辭其勞，皆非本意。

右第二章姚氏鼐合此章與下章為一。云萬物作焉以下處無為之事也。不尚賢以下行不言之教也。今不取。

不尚賢，使民不爭，不貴難得之貨，使民不為盜，不見可欲，使心不亂。傳奕本作使民心。淮南子無民字。是以聖人之治，去李道純本無之治二字。傳奕本之治下有也字。虛其心，實其腹，弱其志，彊其骨，常使顧歡本下無知字。無欲使夫音扶。知者不敢為也。知去聲。王弼本作智者，焦竑云一本無敢字。傳奕本無也字。為無為，則無不治。治去聲。傳奕本治作為又治下有矣字。河上王弼本無。

老子救世之書也。故首二章統言宗旨。此遂以太古之治，矯末世之弊。夫世之不治，以有為亂之也。有

爲由於有欲。有欲由於有知。日啓其無涯之知。而後節其無涯之欲。是濫觴江河。而徐以一葦障之也。太上未嘗自謂有知。未嘗見有可欲。故其治世也亦然。所謂賢者。專指瑰材畸行而言。蓋君子好名。小人好利。賢與貨皆可欲之具。是故人以相賢爲尙。則民恥不若。而至於爭貨以難得爲貴。則民病其無。而至於盜。皆由見可欲耳。治世人尙純樸。無事乎以賢知勝人。物取養人。無貴乎難得而無用。則賢與不賢同用。難得與易得等視。民不至見之以亂其心。而爭盜之原絕矣。夫民心之不虛者。以其有可尙。可貴可欲之事也。志以不弱者。以其有爭盜悖亂之萌也。今旣心無外慕而虛矣。則腹雖實而含哺鼓腹。自無所紛其心。志無忿競而弱矣。則骨雖強而精足筋完。自無所逞其力。蓋道以虛爲體。以弱爲用。無事乎實與強也。故可實者惟腹而已。可強者惟骨而已。以虛弱爲心志。而置強實於無用之地。則其心志常無知無欲矣。無知無欲則無爲。縱有聰明知識者出。欲有所作爲。而自不敢爲。無爲之爲。民返於樸而不自知。夫安有不治哉。張氏爾歧謂心腹志骨四者皆借喻也。聖人之治。於華豔之事則務空之。於質樸之業則務充之。於爭競之端則務塞之。於自玄之實則務崇之。使民無知而不生分別之見。無欲而不起貪得之心。其說亦通。至後世養生家亦借四者爲說。則舛矣。

右第三章

道沖而用之。

沖說文作盅。傳奕本亦作盅。淮南子及諸家作沖。姚鼐曰。道盅句與宗爲韻。

又弗盈。河上王弼本作或不盈。開元蘇轍本作淵兮似不盈。傳奕本作又不滿。此從淮南子。

似萬物之宗。淵兮河上本作淵乎。釋文作淵。實案當古兮字。此從王弼本。挫其銳。解其紛。紛碑本作忿。釋文云一本作芬。和其光。同其塵。湛兮似或存。碑本無兮字。或存作常存。河上王弼本作若存。此從傅奕本。吾不知其誰之子。象帝之先。陳象古本誰下無之字。

此章乃常無觀妙之事也。說文曰。虛器虛也。道之體本至也。而用之有能不盈者乎。則淵然其深。物物而不物於物。似萬物之宗矣。夫人之用所以常失之盈者。恃己之銳而與人爲紛。以己之光而照人之塵也。挫其銳則紛自解矣。和其光則塵自同矣。是其用之能不盈也。湛兮若存。則其體仍虛矣。世或有斯人。則體用一源。復乎道之本然。象帝之先矣。而誰其能之哉。李氏約曰。象似也。道性謙約。故不云定處其先。而云似。蘇氏轍曰。銳挫紛解。則不流於妄。不構於物。外患已去。而光生焉。又從而和之。恐其與物異也。以塵之至雜而無所不同。則於萬物無所異矣。聖人之道如是而後全。則湛然常存矣。雖存而人莫之識。故似或存耳。源案末二語。就體道之人言之。方平易親切。諸家皆謂推極。然問道爲誰氏之子。既太支離。而推道爲在帝之先。又太幻渺。故並不取。

右第四章

天地不仁。以萬物爲芻狗。聖人不仁。以百姓爲芻狗。天地之間。其猶橐籥乎。虛而不屈。王弼作掘。傅奕作誼。顧歡作掘。此從動而愈出。多言數窮。傅奕作言多。碑本作多聞。不如守中。谷神不死。是謂玄牝。谷釋文云一本作浴。薛茅曰。牝讀非玄牝之中更有門也。玄牝之門。是謂天地之根。諸本天地之根無之字。若七與上句爲韻。下玄牝之門特綿綿若存。用之不勤。

此老子知已道不行。憫世亂之不救。而思遺世隱處。獨善其身之言也。聖人斥當世之君。予聖自雄者。結芻爲狗。用之祭祀。既畢事則棄而踐之。老子見亂世民命如寄。故感而言曰。悲哉。天地有時而不仁乎。乃視萬物如土苴。而聽其生死也。聖人其不重仁乎。乃視斯民如草芥。而無所顧惜也。諉之於天地。尊之爲聖人。蓋悲天憫人。無所歸咎之詞。然將諉之於天地。而天地不可諉也。夫天地無心而成化。猶橐籥然。中虛無物。氣機所至。動而愈出。所謂顯諸仁。藏諸用。鼓萬物而不與聖人同憂也。是聖人固宜有憂矣。天地無心而成化。聖人則有心而無爲。百姓萬物之責。在於聖人。則非天地之能芻狗之。而人之芻狗之矣。言至此。而老子不欲長言矣。然則吾生天地間。既不能使民物各遂其性。而吾亦將自棄其性。一任天人之芻狗乎。近取諸身。則吾身一小天地也。返觀默識。吾有中而自守之。亦何爲嘵嘵多言。以其身深與天下事。而自取理數之窮乎。黃帝之書有之。其言谷者。卽中也。牝卽谷也。不存之存。所以立體。無用之用。所以應物。誠能體此而守之。小則爲養生專氣之術。大則爲虛靈順應之道。何窮之有哉。蓋虛無因應。用之于世。則爲聖人無爲之治。既不得用。則徒言何益。適足招損耳。不如約其道而用之。返諸一身。微妙渾然。而在我之天下。已羲皇矣。此太上無言之教也。外橐籥機而鼓之。致風之器也。屈竭也。首以天地聖人並言。而繼但言天地。不及聖人者。是卽老子不欲多言之故也。數窮。釋文謂理數勢數也。中者虛中。謂心也。谷牝皆中之喻。谷神喻其德。玄牝喻其功也。谷之於響。惟其無所

不受。是以無時不至。是其神之存於中而長不死者也。天下之物。惟牝能受能生。若夫受而不見其所。以受生而不見其所以生。則尤玄妙不測之牝也。可以母萬物。而萬物皆從此門出。豈非天地根乎。是即首章所謂無名天地之始。有名萬物之母也。是常道也。綿綿若存。觀妙之事。用之不勤。觀徼之事也。吳氏澄曰。谷虛則神存於中。若存即神之存。勤猶勞也。凡氣逸用之則養而日增。勤用之則虛而多耗。神常存則氣不耗散也。

右第五章。河上公多言守中。以上為前章。姚氏鼎以多言守中。合下谷神為後章。蓋二句乃承上轉下之。案列子引谷神以下。為黃帝書。可見老子言方畢。因引古語以明之。其不得別為一章無疑。此章自來解者。皆首尾橫決。詞義間隔。其尤誤者。莫如以不仁。蜀狗為明。因物無心之道。夫人與蜀狗為二物。若聖人之於百姓。同一人耳。安得而蜀狗之乎。且三寶首慈。天將衛之。以慈救之。而憺憺致痛於佳兵。不祥之戒。若以不仁為教。豈一人之言。而矛盾若此。且如其說。與通章亦不相貫。而以囊籥為守中之喻。以數窮為多言之耗氣。皆支離之甚。王氏道有曰。後世不明於蜀狗萬物之言。而因謂道德之禍流。為刑名。此亦多言數窮之驗。老子著書。而其言若此。夫非有大不得已於中者乎。斯論得之矣。

天地長久。碑本作天。天地所以能長且久者。本無者字。且字。碑本無。當從之。以其不自生。故能長生。長生。是以聖人後其身而身先。外其身而身存。非以其無私邪。傳奕非字作不。河上本無非邪。故能成其私。上章谷神不死。而為天地根。此天地之所以長久也。天施地生。而不自私其生。故能長生。使天地而自私其身。則天地亦一物矣。何以能長且久哉。是以聖人處柔處下。本以先人而後其身也。而人愈貴之。寡欲無求。本以利人而外其身也。而人愈不害之。其後身外身。夫非心之無私邪。乃身以先且存焉。而

成其私亦理勢之固然耳。程氏俱曰：天地人同源耳。天之所以為天，地之所以為地，人之所以為人，固同。而天地之能長且久，人獨不然者何哉？天不知其為天，地不知其為地，今一受形而為人，則認以為己。曰：人耳。人耳，謂其有身不可以不愛也。而營分表之事，謂其養生不可以無物也。而騁無益之求，貴其身而身愈辱，厚其身而身愈傷。是世之喪生者，非反以有其生為累邪？黃老之旨如此，豈養生家自私其身者所得託哉？李氏嘉謨曰：天不愛其施，地不愛其生，是謂不自生。不自生，萬物恃之以生，故能長生。此天施地生之道，所以未嘗一日息也。

右第六章

上善若水，水善利萬物而不爭。

陳景元作又不爭。

處衆人之所惡，故幾於道。

處傳奕本作居，宋徽宗本衆人下無之字，惡去聲。傳奕本道下有矣字。

居善地，心善淵，與善仁。

仁傳奕作人。

言善信，政善治，事善能，動善時。夫惟不爭，故無尤。

傳奕尤下有矣字。

李氏贊曰：凡利物之謂善，而利物者又不能不爭，非上善也。惟水不然，衆人處上，彼獨處下，衆人處易，彼獨處險，衆人處潔，彼獨處穢，所處盡衆人之所惡。夫誰與之爭乎？此所以為上善也。居善地以下，則言聖人利物而不爭之實，非仍指水也。呂氏惠卿曰：江海所以能為百谷王者，以其善下之，所謂居善地也。七者皆出於不爭，而要以處善地為本。蓋居善地則能處衆人之所惡，故不爭而天下莫能與爭矣。吳氏澄曰：所舉居善地以下數事，皆擇取衆人之所善者以為善，非上善也。惟有此善而能不爭，如

水之源處上而甘處於下。乃上善也。衆人惡處下則必好處上。欲上人者有爭心。有爭則有尤矣。不爭則何尤之有。○蘇氏轍曰。一陰一陽之謂道。繼之者善也。天一生水。道運而爲善。猶氣運而爲水也。二者皆自無而之有。去道未遠。故可名之善。未有上於此者焉。道無所不在。水無所不利。避高趨下。未嘗有所逆。善地也。空處湛靜。深不可測。善淵也。挹而不竭。施不求報。善仁也。圓必旋。方必折。塞必止。決必流。善信也。洗滌羣穢。平準高下。善治也。以載則浮。以鑑則清。以攻則堅。彊莫能敵。善能也。不舍晝夜。盈科後進。善時也。夫有不善而未免人非者。以其爭也。水惟兼此七善而不爭。故無尤矣。源案居善地以下諸解。或以水或以人皆可通。惟卽以此數者爲上善。則不若以不爭爲上善之說之得焉耳。

右第七章

持而盈之。不如其已。持。司馬本作恃。博奕本作傲。而。王弼亦作。金玉滿室。莫之能守。河
上及諸本作堂。此從淮南子。保碑本作寶。金玉滿室。莫之能守。河
從王弼傳奕本。富貴而驕。自遺其咎。驕。司馬本作僑。功成名遂身退。王弼作功
引子所

持而盈之。謂盈而持之也。揣而銳之。謂銳而揣之也。知盈而持。知銳而揣。已爲不善。况盈不持而金玉滿堂者乎。將多藏厚亡。莫之能守矣。况銳而不揣而富貴益驕者乎。將未能驕物。先自遺咎矣。蓋滿而不溢。所以長守富。高而不危。所以長守貴。夫何以能不溢不危哉。法天之道而已。日中則昃。日滿則虧。

四時之運。成功者退。天地尚然。而况於人乎。亢之為言也。知進而不知退。知存而不知亡。知得而不知喪。是以動而有悔也。聖人成功而不有。安有盈。名遂而不居。安有銳。蓋隨事大小而能自全。故曰成曰遂也。若不知自足。則何時而為成。何日而後遂邪。此言非必處山林絕人事。然後可以入道。雖居功名富貴之域。皆可守而行之也。

右第八章

載營魄營讀為魂抱一傳奕作襲能無離乎河上公無六乎字專氣至柔諸本作致能如嬰兒乎。滌除玄覽。能無疵乎。愛民

治國能無為乎。天門開闔。能為雌乎。明白四達。能無以知乎。生之畜之。生而不有。為而不恃。釋文云。河上

知又作智。特作侍。○為雌。河上公作無雌。○河上王弼本無為無知。前後長而不宰。是謂玄德。此章字句。並從淮南

子。互易。傳奕本為乎。知乎。上有兩以字。○焦炫云。一本無生之畜之四字。載猶處也。營魄即魂魄也。魄即是一載。即是抱魂。載魄動守靜也。心之精爽。是謂魂魄。本非二物。然魂動而魄靜。苟心為物役。離之為二。則神不守舍。而血氣用事。惟抱之為一。使形神相依。而動靜不失。則魂即魄。魄即魂。何耗何昏。乃可以長存。蓋非偶載之難。亦非抱一之難。而常不離之難也。修身養生。道皆如此。專即易其靜也。專之專。言專一純固。無所發露。所謂純氣之守也。有一毫失之粗。則剛而不能柔。必如嬰兒之和氣內充。一而不雜。而後為至柔也。至人外不為魄所滯。內不為氣所使。其自治可謂

善矣。然猶恐有餘疵之存也。未學之疵。粗而易改。既學之疵。微而難除。或守之徒滯而運用不靈。或執之未化而常存我見。是皆足爲病。而未盡合乎玄也。必加以滌除瑕垢之功。重以返觀內照之鑒。其果純合自然而無所疵已乎。焦氏竑曰。前三言者。老子示人可謂切矣。然智者除心不除事。昧者除事不除心。苟誤認前言。其不以輓斷爲學者。幾希。故又示之曰。我所言載營魄者。非拱默之謂也。卽愛民治國而能無爲也。所謂爲無爲也。專氣致柔者。非鬱閉之謂也。卽天門開闔而能爲雌也。所謂雄守雌也。滌除玄覽者。非昧晦之謂也。卽明白四達而能無知也。所謂知不知也。夫愛民治國。天門開闔。明白四達。其於生之畜之。爲之長之。皆不廢矣。而無爲也。爲雌也。無知也。則生不有。爲不恃。長不宰者。非玄德而何。此關尹子所謂在己無居。形物自著。莊子所謂以虛空不毀萬物爲實者。夫豈棄人事之實而獨任虛無也哉。蘇氏轍曰。聖人於道。旣以治身。又推其餘以治人。然皆以無心遇之。苟有其心。則愛民者適以害之。治國者適以亂之也。陽動陰靜。一開一闔。治亂廢興所從出。衆人當此際。患得患失。每先事而徼福。聖人循理而知天命。則待倡而後和。所謂先天而天弗違。後天而奉天時者。言其先後適與天命會耳。故能爲雌者不失時也。李氏贄曰。抱玄守一。神不外馳。則中有主。而天門開闔常在我矣。彼世之不能自主者。有開則將。不待迫之而自起。有闔則逆。不能無事而常足。是內淫也。安能抱一而不離乎。張氏爾岐曰。元覽卽觀妙觀微之觀。天門開闔。指心之運動變化言。朱子曰。老子之學。以虛靜無

爲沖退自守爲主。與莊生釋氏之旨。初不相蒙。而說者常欲合而一之。以爲神常載魄。而無所不之。此解老者之通蔽也。

右第九章

三十輻共一轂。當其無。有車之用。埴埴以爲器。當其無。有器之用。鑿戶牖以爲室。當其無。有室之用。故有之以爲利。無之以爲用。

輻。輪之轄也。轂。衆輪所湊之心。考工記云。轂也者。所以爲利轉也。利轉者。以無有爲用也。正同斯旨。埴。和也。埴。黏土也。和水土而燒爲匱也。凡室之前。東戶西牖。戶以出入。牖以通明也。無皆謂空虛之處也。吳氏澄曰。器以貯物。室以居人。車以載重。致遠。皆所以爲天下利。利在有也。然車以轉軸爲用。器以容物爲用。室以出入通明爲用。皆在於空虛無礙之處。人之腹實而心虛。亦猶是也。呂氏惠卿曰。非有則無。無以致其用。非無則有。有以施其利。觀於車器居室。而其則不遠矣。至於身。則不知吾之所以爲用者何邪。是故聖人入而未嘗有物。所以觀其妙。出而未嘗無物。所以觀其微。故曰。利用以安身。而入神以致用也。知兩者之合一。而不可離。則至矣。薛氏蕙曰。章末雖並舉有無而言。顧其旨意。則卽有而明無之爲貴也。蓋有之爲利。人莫不知。而無之爲用。則皆忽而不嘗。故借人所明數事。以曉之。

右第十章

五色令人目盲。五音令人耳聾。五味令人口爽。令爽皆平聲馳騁田獵，令人心發狂。難得之貨，令人行妨。是以聖人爲腹不爲目，故去彼取此。

爽，差也。謂失正味也。視久則眩，聽繁則惑，嘗多則厭，心不定，故發狂。不知足以取辱，故行妨。李氏約曰：目無厭，腹知足，故聖人去取異焉。目外視，故云彼腹內實，故云此。呂氏惠卿曰：腹無知，目有見者，是以聖人去彼有見有欲之追求，而取此無知無欲之虛靜也。猶易艮其背，陰符機在於目之意也。葉氏思靖曰：凡所欲之外物，皆害身者也。聖人但爲實腹而養已，不爲悅目而徇物。然食味別聲被色，數者皆不可絕，惟雖動而不著于物，乃湛然無欲矣。凡染塵逐境，皆在於目，故始終言之。此顏子四勿所以先視而剷除六根，以眼色爲首也。前章言虛中之用，此則戒其勿爲外邪所實。

右第十一章

寵辱若驚，貴大患若身。何謂寵辱？此句他本亦有若驚二字，惟河上及開元本無之。寵爲下，三字從王弼傳，奕開元本，河上作何謂寵辱若驚，寵爲下，陳景先李道純作何得之若驚，失之若驚，是謂寵辱若驚。吳澄本無此六字。何謂貴大患若身？吾所以有大患者，一無者惟吾有身，苟吾無身，苟字，諸本皆作及，此從傳奕本。吾有何患？故貴以身爲天下，則可寄於天下；愛以身爲天下，乃可託於天下矣。寄託下各本無於字，開元本兩可字皆作若字，傳奕本天下下各有者字，兩可字上皆作則字，天下末各有矣字，此四句並從淮南子及河上本。寵榮也，貴重也。世人不知辱之爲辱而寵之，不知患之爲患而貴之，是榮其辱而貴其患也。若驚，甚言

其寵也。若身甚言其貴也。夫人莫不惡辱而畏患。今反謂其寵而貴之何哉。蓋世人相習於妄見。則不知反其本。相安於當境。則未觀其終。何謂人之寵其辱哉。正以可辱者。卽人之所謂寵也。夫寵人者。上人。寵於人者。下人。爲人下。非辱而何。而世人反榮之。得之則驚喜。失之則驚憂焉。是豈非惟辱是寵乎。寵辱之寵。以己言。寵爲下之寵。以人言也。何謂人之貴其患若身哉。正以可患者。皆人之所謂必不可無者也。人惟自私其身。有欲則有患。苟能外其身後其身。何患得患失之有。然則凡養身之可欲者。非大患而何。而人專重之。一若與生俱生。而不肯暫舍焉。是豈非貴大患若身乎。是皆不知自重自愛之道故也。倚人之寵。以爲重。而適以自輕。若果能自重。則雖榮以天下。而不肯輕以身處之矣。徇外之求。以自奉。而適以自苦。若誠能自愛。雖付以天下。而惜以身任之矣。如此則若以身寄託於天地之間。蓋有天下而不與焉者。直若寄焉而已。淮南子引老子此語。而證以太王避邠。杖策而去於岐山之下。是也。夫不能寵者。復何辱之有。身外無所貴者。夫何患之自取哉。此章謬解不一。大抵以驚寵爲當然。以忘身爲幻泡。以寄託爲可付重任。今悉不取。而擇其稍合者於後。○吳氏澄曰。人以爲榮者。自知道者。反觀之。則辱也。有何可愛。而愛之者。於此而驚焉。人以爲大利者。自知道者。反觀之。則大患也。是豈足貴而貴之者。於此而身焉。是故被寵至卑下耳。而得失動心。身外之物。至輕耳。而若與身俱有。則惑之甚也。呂氏惠卿曰。寵者畜於人者也。下道也。寵而有其寵。則辱矣。吾之所以有辱者。以吾有驚。既驚其

得復驚其失。若吾無驚。吾有何辱。吾之所以有大患者。為吾有身。故吉亦我所患。凶亦我所患。若吾無身。吾有何患。

右第十二章

視之不見。名曰夷。聽之不聞。名曰希。搏之不得。名曰微。此三者一本無此字不可致詰。故混而為一。蘇轍本。故下有復字。其上不皦。其下不昧。傅奕本作其上之。其下之。繩繩兮不可名。王弼無兮字。復歸於無物。蘇轍本。物作象。是謂無狀之狀。無象之象。是謂忽恍。碑本無是謂忽恍四字。迎之不見其首。隨之不見其後。執古之道以御今之有。能知古始。是謂道紀。

吳氏澄曰。此章專言德迹之呈露者。曰夷曰希曰微曰一。皆指德而言也。德在有無之間。故雖若有名而不可名。無物指道而言。反還其初。則歸於無物之道。莊子所謂德同至於初是也。道紀者德也。呂氏惠卿曰。無前後則無古今矣。無古今則長於上古而不為老者。吾得之以日用矣。知今之所從來。則知古之所自始。所謂無端之紀也。道不可執。得此則可執之。以為德矣。執德之謂道紀也。

右第十三章姚氏以此通下章為一章。

古之善為士者。傅奕本。作為道。微妙玄通。深不可識。夫惟不可識。故強為之容。傅奕本。容下有曰字。豫若冬涉川。猶若畏四鄰。儼若客。渙若冰將釋。諸本豫猶儼。渙下多有兮字。陸希聲無之。王弼豫兮作與焉。儼兮下有其字。客作容。冰下有之字。釋文云。豫或作與。碑本釋作沟。下三句作渾若樸。曠若谷。混若濁。敦兮其若樸。曠兮其若谷。渾兮其若濁。孰能濁以止。靜之徐清。孰能安以久。動之徐生。傅奕本。靜上有澄字。徐上各有而字。

陸希聲無久字。司馬無動字。保此道者不欲盈。曰。高誘淮南子注。夫惟不盈。故能敝而不新成。傳奕作自以。今從河上本以止與久爲韻。碑本作能敝復成。王弼作敝。或又作弊。此從淮南子引。

此章不言聖人至人而言善爲士者。是專示人入道之要。而強爲之容也。羸盡而微。微至而妙。妙極而玄。則無所不通而深不可識矣。戒而後動曰豫。其所欲行。迫而後動。不得已也。疑而不行曰猶。其所不欲。遲而難之。如有所畏也。儼若客不敢肆也。此三者皆有道者不敢爲天下先。其容若此。然其豫猶儼恪者。初非有所執而不化也。渙若冰之將釋。油然無形而物莫之覺矣。夫奚滯之有乎。故又以下三者形容之。爲道至於融釋。則反本完真。乃能存天性之全而不雕於人僞。故若樸也。性全而不自有其全。無所不受。故若谷。水性本清而不自潔於物。故若濁。夫七者有道之容。而卽求道之要。豫猶儼恪者。所以入德也。旣渙然冰釋。乃能希夫敦樸曠渾之全。所以成德也。道至於濁。則和光同塵。與物一體。此忘我之極而最難者也。故卽承濁問曰。孰能濁以止乎。濁者動之時也。動久而靜。吾恐其又察察以爲清矣。因又承靜問曰。孰能安以久乎。安者靜之時也。靜繼以動。吾恐其又紛紛而生起矣。是皆知道而不能自保者也。所以不能保。皆由其易盈。是以分別與躁動乘之。而不能止且久。惟不以善自盈。則能安其敝而不求新成。斯則其能濁也。安以久也。如此則微妙玄通之道。斯可保矣。蓋敦樸曠渾者。濁之容。豫猶儼恪者。安之容。皆以沖得之。以盈失之者也。老子之大成若缺。其用不敝。大盈若沖。其用不窮。保

此道之謂也。

右第十四章

致虛極。守靜篤。萬物並作。吾以觀其復。靜傳奕並作靖。吾以下。河上有是。夫物芸芸。各歸其根。云一作凡。

物傳奕芸芸作取取。王弼各下有。歸根曰靜。靜曰復。命曰常。知常曰明。不知常。妄作凶。知復字。莊子作萬物云云。各復其根。

常容。容乃公。公乃王。王乃天。碑本作公。能生。生能天。天乃道。道乃久。歿身不殆。

此極言體常之要。其入手在於觀復。觀復即觀微也。夫物芸芸五句。上即物理之自然。以推動常歸靜之旨。自知常曰明以下。乃言學道者觀復之明。以明致虛守靜之效也。致者至其極也。虛者無欲也。無欲則靜。蓋外物不入。則內心不出也。篤。固也。學道而至於虛。虛而至其極。則其守靜也篤矣。故下文專即至靜而言之。致虛而未知實之即虛。守靜而未知動之即靜者。觀無於無而未於有。觀無故耳。凡有起於虛。動起於靜。故萬物雖並動。卒復歸於虛靜。是物之極篤也。第衆人之於物。息而後見其復。衰而後見其歸根。惟知道者虛靜之至。則見其所以作。與其所以芸芸。其所以作者。乃其所以復也。知作者之皆妄。而靜者之為常。則執性命以命羣物。常有而常無。常作而常靜。知幾之謂明矣。何有妄作之凶乎。夫知非聞見測度之謂也。能渾一於物我之間。外無不容。而內無或私者。庶乎真知之矣。是故言其大則內聖而外王。言其化則合天而盡道。盡道者無他焉。常而已矣。久而不殆者。常之謂也。○蘇氏轍

曰致虛未極。則有未亡也。守靜不篤。則動未亡也。丘山雖去。而微塵未盡。未為極與篤也。不極不篤。而責虛靜之用難矣。虛極靜篤。以觀萬物之變。而後不為變之所亂。知作之未有不復也。苟吾方且與萬物皆作。則不足以知之矣。萬物皆作於性。皆復於性。猶華葉之生於根。而歸於根。性命者萬物之根也。苟未能自復其性。雖止動息念以求靜。非靜也。惟歸根以復於命。而後湛然常存矣。不以復性為明。則皆世俗之智。雖自謂明。非明也。故緣物而動。無作而非妄。雖或得於一時。而失之遠矣。方迷於妄。則自是而非彼。物皆吾敵。苟知其皆妄。則雖讐仇將哀而憐之。何所不容哉。則彼我之情盡。尚誰私乎。無所不公。則天下將往而歸之矣。

右第十五章

太上。下知有之。其次親之。譽之。其次畏之。其次侮之。下知。吳澄作不知。王弼作其次親而譽之。開元御注作其次畏之。侮之。陳象古作畏而侮之。信不

足。有不信。二句末。王弼皆有焉字。傳奕上句有焉字。陸希聲本無。猶兮其貴言。王弼作悠兮。釋文云。一作由兮。陸希聲無兮字。碑本作其猶貴言。傳奕貴言下有哉字。巧成事

遂。一作名。遂。百姓皆謂我自然。傳奕作皆曰。司馬本無皆字。大道廢。有仁義。智慧出。有大偽。傳奕廢下出字。並有焉字。六親不和。有孝慈。

國家昏亂。有忠臣。傳奕本。作孝子貞臣。絕仁棄義。民復孝慈。絕聖棄智。民利百倍。各本絕聖棄智二句。在絕仁二句之上。此從永樂大典。王弼本及吳澄本。

絕巧棄利。盜賊無有。此三者以為文不足。傳奕作以為文而未足也。李約亦作未足。故令有所屬。見素抱樸。少私寡欲。襄今作抱。

古今字

陸氏希聲曰。太古有德之君。無爲無迹。故下民知有之而已。德既下衰。仁義爲治。天下被其仁。故親之。懷其義。故譽之。及仁義不足以治其治。則以刑法爲政。故下畏之。及刑法不足以服其意。則以權譎爲事。故下侮之。此皆由誠信遞降。故漸有不信。若夫在上者行不言之教。而及其成功。百姓各遂其性。皆曰我自然而然。則親譽畏侮之心不生於世矣。吳氏澄曰。猶兮其貴言。使民陰受其賜。皆謂我自然如此。不知其爲帝力。此則太上不知有之之事也。夫不知有之者。大道親譽之者。仁義畏之者。智慧侮之者。大僞。是自大道一降再降。共有此數等。然大道廢而後有仁義。則其變猶緩。智慧出而適有大僞。則其變爲甚亟。六親不和二語。亦大道廢有仁義之事。而推言之耳。以上言世變之降。以見趨末之由。以後言治化之復。以示返本之漸。聖智。智慧也。巧利。大僞也。絕棄帝者仁義。以返於皇之大道。則民復其初。父慈子孝。如淳古時矣。絕棄王者聖智。以及於帝之仁義。則民利其利。百倍於王之時矣。絕棄伯者巧利。以及於王之聖智。則雖未及帝之時。而思慮深遠。政教修明。亦無有爲盜賊者矣。此三者指仁義聖智巧利三事也。屬與莊子屬其性乎仁義之屬同。猶云附著也。皇之大道。實有餘。文不足。自皇而降。漸漸趨文。故遞以前此之文爲不足。而各附著於所尙。是以屢變而趨於末。而豈知大道之民。見素抱樸。質而已矣。如此則少私寡欲。何以文爲。上云六親不和有孝慈。而又言民復孝慈者。蓋人孝慈則無孝慈之名。此名實文質之辨也。以是推之。則真仁義者無仁義之迹。真聖智者無聖智之名。亦若是而

已見素抱樸。少私寡欲。則我無爲而民自化。我無欲而民自樸。此聖智之大。仁義之至。巧利之極也。○
李氏嘉謨曰。道散則降而生非。僞勝則反而貴道。降者道之微。反者衰之極也。方道之未散。仁義潛乎
其中。不可分別指數。及其煦煦子子。而人以煦煦子子懷其德。則大道之公者散矣。又不幸有小智小
慧者。竊仁義之似而行之。則僞自此滋。亂自此始。是之謂降而生非。及其末流。人僞既多。無非非者羣
非之中。稍有自異。於是從而貴之。故六親不和。然後知有孝慈。國家昏亂。然後知有忠臣。是謂反而貴
道。方其散。則見其似而忘其全。及其衰。則蕩然無餘而貴其似。此其所以每況而愈下也。故老子教以
絕利一源。返本救末之要。蓋仁者不自以爲仁。義者不自以爲義。使仁義而可絕。皆非仁義也。大巧不
見其巧。美利不言所利。使巧利而可絕。皆非巧利也。聖人用其實。不取其文。故其見於外者。無其形。衆
人竊其似以亂其真。故令見於外者有所屬。聖人惡僞之足以亂真。故欲絕其本源。以救末流之弊。使
天下之人。不復假仁義而棄孝慈之實。懷利心而竊聖智之行。用盜賊而棄巧利之便。惟以樸素先民。
而不欲以私欲示民。民見其如此。故不敢以文欺物。而亦不以文自欺。

右第十六章

河上公以我自然以上爲一章。大道廢四句爲一章。絕仁棄義至末爲一章。今攷其詞義。相承別無更端。故永樂大典王弼本合後兩段爲一章。得之矣。吳澄本並通三章爲一。於

義尤備。故從之。至唐張君相以下。章絕學無憂句。附此章之末。而姚氏鼐從之。則文義音韻俱不協。今不取。

絕學無憂。唯之與阿。相去幾何。善之與惡。相去何若。善傳奕作美。何若王弼作若。何人之所畏。不可不畏。荒兮其未央哉。

荒兮句碑本作莽其衆人熙熙如享太牢如登春臺如字傳奕皆作若陸希聲王我獨泊兮其未兆如嬰

兒之未孩泊一作怕傳奕作魄碑本我魄未兆釋文泊作廓孩作咳乘乘兮若無所歸傳奕作儻儻兮若不足似無所歸此從河上本衆人

皆有餘而我獨若遺傳奕無我愚人之心也哉沌沌兮俗人昭昭我獨若昏俗人察察我獨悶悶沌沌河

純釋文云或作恹恹俗人河上作衆人察察悶悶傳奕作昏昏忽兮若晦兮若海唐易州石刻作忽若晦

閱閱又昭管上並有皆字釋文云昭一作照若昏王弼作昏昏忽兮若晦兮若海唐易州石刻作忽若晦

案劉熙釋名飄兮若無所止飄河上作漂王弼作飄釋文云梁簡文作衆人皆有以我獨頑似鄙河上土

似作且我獨異於人而貴食母傳奕作我獨欲異於人開元本作貴求食於母自注云舊無求

上章言治國之道惟絕聖智巧利則無弊所以言無爲之用此章言修己之道惟絕世俗末學則無憂

所以明無欲之體也唯之與阿至荒兮未央七句言世人爲學多憂之事也衆人熙熙至我獨若遺八

句言己之無所欲於外也我愚人之心至頑似鄙十句言己之不求知於內也未句正與章首句相應

蓋所絕者世俗之學而所貴者食母之學也蓋憂生於畏彼世之爲學者但以爲善勝於惡揚揚自得

而以吾觀之正猶唯之與阿耳何者論斯人之本心豈真樂唯而苦阿樂善而苦惡二者之間相去幾

何徒以人皆唯阿之慢人而取辱畏惡之失譽而招刑是以亦不得不畏彼而爲此耳迫於無可奈何

而爲之且抱此憂以畢生而荒兮安有窮極乎然在世人心豈真知其多憂彼固將以求樂方熙熙

然徇物有餘也且世人心又豈自以無知方且自以爲昭察而視我爲沌愚昏悶頑鄙也然則豈我

獨甘為其賤而異於人情乎。我固自有我之所貴。但與人不同耳。德者萬物之母。道又德之母。衆人逐物役智以資其視聽思慮。則養其子而已。我獨遺而去之。味道德以自養。然則絕憂畏之學者。正所以貴食母之學也。而揚子雲謂人而絕學。雖無憂如禽何。豈知所以絕學之意者哉。澹泊然情欲未萌。如嬰兒未能咳笑之時。初不知外物之可樂也。乘乘然寄寓於物而不著於物也。衆人皆有求贏餘之心。我獨遺棄之。豈真愚而如此沌沌然哉。蓋道以不足為樂。而無有餘之心。是以人若昭察而我若昏悶也。如此則此心茫茫所向。如乘舟大海之中。漂浮而無繫著。即乘乘若無所歸之意。有以有為也。頑似鄙者。若遠鄙之民不識都邑也。食母見禮記內則篇。即乳母也。貴食母者。即嬰兒未咳之義也。

右第十七章姚鼐本以首句屬上章。又以此章通下章為一章。曰唯之與阿以下。求道者之狀。孔德之容以下。得道者之實。今不取。

孔德之容。惟道是從。是從傳奕。作之從。道之為物。惟恍惟惚。忽兮恍。其中有象。恍兮忽。其中有物。窈兮冥。其中有

精。忽恍四句。河上本上下互易。王弼作恍惚。河上作恍忽。傳奕作芒芴。窈又作幽。開元本無前三其字。河上王弼本三其上各有兮字。顧歡本作惚恍。恍中有物。恍惚中有象。窈冥中有精。此數句從文選注及明

本。魚竅其精甚真。碑本無此句。其中信自古及今。其名不去。以閱衆甫。傳奕古今二字互倒。吾何以知衆甫之然哉。以此

傳奕何以作奚。以王弼然哉作狀。李約本無哉字。釋文云一作吾何狀也。

孔大也。從自也。言盛德之容。皆自道中出也。恍忽似有似無。窈冥則全不可見。此皆言道之無也。有物有象者。德之容。猶其粗者。德則有物有象之本。尤其精也。莊子云。以德為本。以本為精。是言德出乎道。

也。信驗也。甫者稱謂之直詞。衆甫猶言衆有。廣雅云甫衆也。○王氏道曰。孔德之容。卽前章泊兮未兆。以下是也。盛德之容。皆從道出。此聖人所以貴食母也。下乃反復形容道體之妙。物卽象也。眞卽精也。信卽眞也。變文協韻耳。衆甫。天地萬物自道出者皆是也。衆甫與化遷流。而道則終古自若。故曰自古及今。其名不去。以閱衆甫。吾何以知衆甫爲道所閱哉。正以體道至眞至信。無可變壞。故常主萬象。如傳舍之閱過客然也。李氏嘉諱曰。有中之有。衆皆以爲有。而不知盡妄也。無中之有。人所不知。而不知其有至眞也。惟其眞而不假。故不以有而存。不以無而亡。是謂有信。終古不變。不易。聖人所以能觀羣有之始。而知羣有之所由然。以其體於至無。故能觀衆有也。源案焦氏竝以甫爲始。謂觀其微則後際空。閱衆始則前際空。萬物並作而觀其復。則當虛空。姚氏鼎又謂衆甫聖賢也。同有此道。可以知先聖後聖之狀如一矣。二說並通。然非本旨。

右第十八章

曲則全。枉則直。直。傳。及。碑。本。作。正。窪則盈。河。上。作。窵。願。歡。作。滂。敝則新。王。弼。作。蔽。河。上。作。弊。少則得。多則惑。是以聖人抱一爲天下式。傳。奔。無。是。以。二。字。抱。一。下。有。以。字。不自見。故明。不自恃。故彰。不自伐。故有功。不自矜。故長。夫惟不爭。故天下莫能與之爭。河。上。作。夫。惟。不。矜。故。天。下。莫。之。爭。古之所謂曲則全者。豈虛言哉。傳。奕。虛。言。下。有。也。字。誠全而歸之。

莊子天下篇稱老子之學。人皆求福。己獨曲全。故此以曲則全一語始終之者。蓋不欲直。不欲盈。不欲

新且多。皆不求全之推也。曲者一曲也。抱一故爲曲。然而全德在此矣。不云少則多而析爲兩言者。以啓下文抱一之旨也。一者少之極。然抱之以爲天下式。則其得多矣。彼喪生由其多方。而亡羊苦於歧路。皆多則惑者。下章以爲天下式。爲天下谷。並言蓋式者。車所俯憑。物卑而人敬之。故以喻聖人沖虛之德也。夫目至明而不自見。使目而自見。則不明矣。人之不自是。自矜自伐。亦猶是也。能是者無他焉。抱一則無我。無我則不爭。夫惟不爭。故天下樂推而曲全之耳。曲則全。蓋古有是語。而老子述之。故又申之曰。此豈虛語哉。夫固誠然之理之效也。蓋正言若反。天下莫不知而莫能行。孰是執信不惑者乎。其丁寧之意至矣。○蘇氏轍曰。直而非理。則非直。循理雖枉。天下之至直也。衆所歸者。下雖欲不盈。不可得也。昭管非道。悶悶者雖敝。而日新之所自出也。道一而已。得其一。本則無所不得。若多而逐於末。則惑矣。抱一者。復性者也。曲全枉直。窪盈敝新。皆抱一之餘也。故以抱一終之。不自見。不自是。不自矜伐。皆不爭之餘也。故以不爭終之。○呂氏惠卿曰。天下之物。惟水爲幾於道。涓源濫觴。而卒會乎海。是曲則全也。避礙萬折。而必東。是枉則直也。善下而百谷歸之。是窪則盈也。受天下之垢。而莫清焉。是敝則新也。惟抱一者。足以語此。故曰少得而多惑。蓋可曲可枉。可窪可敝。無往而非一也。

右第十九章。晁氏說之曰。嚴君平老子指歸。谷神子注。頗與諸本章句不同。如以曲則全章。末十七字。屬下章之類。姚氏兼通下。希言自然。跋者不立爲一章。曰全言然三字。爲韻。吾誠有全德而天下歸之。則希言而自然矣。飄風疾雨以下。釋枉則直。窪則盈之意。信不足以下。皆內不足而故爲有餘。多則惑者也。說頗牽強。今不取。

希言自然。飄風不終朝，驟雨不終日。孰爲此者？天地。傳：奔希作稀。終朝作天地尚不能久，而況於人乎？故

從事於道者，同於道；德者同於德。失者同於失。道者同於道下。傳：奔多從事於德者。從事於失者二句。同

於道者，道亦得之；同於德者，德亦德之；同於失者，失亦得之。此三句。河上王弼本。得上並有樂字。河上本

信不足，有不信。二句。王弼本有兩焉字。傳：奔惟上句有焉字。跂者不立，跂。王弼跨者不行。自見者不明，自是者不彰。自伐者無

功，自矜者不長。其於道也，王弼作其曰：餘食贅行，物或惡之。一本或故有道者不處。傳：奔處字

上章言有道者所抱之事，此章言與道相反之失。義互相發，觀自見自是自伐，自矜四語，與上章重出

而一正言一反言是也。希言而玄同，自然者也。風之飄，雨之驟，立之企，行之跨，食之餘，形之贅，皆非自

然者也。蓋時然後言，人不厭其言。如時雨之應會而至，不疾不徐。若非自然而強談詭辯以驚世，此猶

飄風暴雨，徒盛於暫時而已。道者德者失者，統言世上從事於學之人，有此三等也。全其自然之謂道，

有得於自然之謂德。失其自然之謂失。同猶尚書與治同道與亂同事之同，得之猶從之，言爲道爲德

爲失，初非生而分別。但人之從事於學者，所得各有不齊，是以各以類別耳。道本自然，人每以造作失

之，無非自取。故王弼有云：以無爲爲君，不言爲教，而物得其真，與道同體。故曰同於道，累少則得，行得

則與德同體。故曰同於德。累多則失，行失則與失同體。故曰同於失。其說近之。而諸家解者皆以此爲

至人玄同應物之旨，牽強不倫。惟傳奔古本文義可徵耳。同於失者，所謂信不足也。失亦得之，所謂有

不信也。己之誠信不足。而後人不信。人不信而後曉曉以言惑人。其尙能希言自然乎。吳氏澄曰。自希言至有不信。既以言明道之得失矣。自跛者不立以下。又以人之行立譬前事。蓋立與行亦因其自然。或於自然之外而求益。跋焉跨焉。增高繼長。何異飄風驟雨之不能常久乎。彼內挾其自見自是之心。而外奮其自矜自伐之習者。若律諸自然之道。何異食之餘。形之贅。同為加多於當分之外哉。幽顯之間。當有物惡之矣。物兼人鬼神而言。司馬光曰。行形古字通用。棄餘之食。適使人厭。附贅之形。適使人醜。呂氏惠卿曰。夫道處衆人之所惡。而曰物或惡之。故有道不處。何也。蓋卑虛柔弱者。衆人之所惡。而棄之者也。高亢剛強。衆人之所惡而爭之者。是以不處。則或處或不處。其為不爭一也。

右第二十章 河上公本分信不足以上為一章以下為一章。諸家因之惟吳氏澄本合為一章。今從吳本。

有物混成。先天地生。寂兮寥兮。 寥鍾會作麗。獨立而不改。而字。王弼無。 周行而不殆。可以為天下母。吾不知其

名。字之曰道。 字之上。傳。強二字。強為之名曰大。司馬程俱本。 大曰逝。逝曰遠。遠曰反。 反。河上及傳。作返。此從王弼。 故天大地

道。大王亦大。 王字。傳。大在天地大之上。城中有四大。而王處其一焉。居。此從淮南子。 人法地。地法

天。天法道。道法自然。 李約以人法地。地法天。天句。法道。道句。法自然句。

有物即前章道之為物也。混渾同。先天地生。所謂無名天地之始也。寂兮無聲。寥兮無形也。體獨立而用周流。是則有名萬物之母也。名不可得。字之曰道。字者代名之謂。道者取於無物不由也。道不足以

盡之故又強名之曰大。乃自大而求之。則逝且遠矣。自遠而求之。則反而近矣。言其遠大則天地莫能盡言。其反則又具之人身而各足。蓋天得一以清。地得一以寧。侯王得一以爲天下貞。是以人與三才參其大。惟其同法乎道故也。末四語以人法爲主。蓋人性之大與天地參。前章言知常容。容乃公。公乃王。王乃天。天乃道。是王者人道之盡。而與天地同者也。言王者何以全其大乎。亦法天之無不覆。法地之無不載。法道之無不生成而已。道本自然。法道者亦法其自然而已。自然者性之謂也。人而復性。則道之量無不全矣。非謂人與天地輾轉相法。而以道爲天地之父。自然之子。並王爲域中五大也。

右第二十一章

重爲輕根。靜爲躁君。靜。傳。奔。作。靖。是以君子終日行。君子。王。弼。作。聖。人。不離輻重。雖有榮觀。燕處超然。燕。王。弼。作。宴。奈何萬

乘之主。傳。奔。作。如。之。何。而以身輕天下。輕則失根。躁則失君。失。根。釋。文。作。失。本。河。上。公。作。失。臣。此。從。永。樂。大。典。王。弼。本。

根本必重於枝葉。君上必靜於臣下。故取以喻也。躁者動之甚也。車行日五十里。師行日三十里。以輻重在後。不敢遠離。是輕之本乎重也。雖有榮華游觀之地。而不及超然燕處。是動以靜爲主也。故君子於天下事。必持重而主靜。韓非子云。制在己曰重。不離位曰靜。重則能使輕。靜則能制躁。此之謂也。李氏贊曰。有輻重則雖終日行而不爲輕。何則。以重爲之根也。有燕處則雖有榮觀而不爲躁。何則。以靜爲之君也。故輕則失重根。躁則失靜君。呂氏惠卿曰。凡物輕者先感。重者後應。故本能制末。靜者御物。

躁者御於物。故靜能君躁。雖行動居處之間。猶不能離此理。況任重道遠以觀天下者。而可不靜且重乎。蓋感而後應。不得已而後動。則重矣。為而無為則靜。苟其動常在於不得已之際。而不能無為。則是以身輕天下而不重。不重則躁而不能靜矣。○李氏嘉謨曰。行必輜重。喻聖人終日無所不至。而不離其本也。榮觀燕處。喻聖人凡事無不為而常無為也。彼為天下主。而徒以身馳驅於其末。則一物足以役之矣。又何足以宰制天下邪。吳氏澄曰。以身輕天下。謂以身輕動於天下之上也。輜重燕處。姑指一端而言。凡人之治心治身。與夫下勢當作國勢之居重御輕。兵法之以靜制動。皆不出此。

右第二十二章

善行無轍迹。善言無瑕譎。善計不用籌策。善閉無關楗而不可開。善結無繩約而不可解。傳本善行善言善計善閉善

結下各有者字。又作善數者無籌策。陸希聲策作算。傳本楗作

鍵。兩而不可作。故不可。淮南子閉結下有者字。開解下有也字。是以聖人常善救人。故人無棄人。常善救

物。故物無棄物。他本兩故字下。無人物二字。此是謂襲明。是以聖人下四句。傳本謂河上本有之。古本無

明。則知非河上所增出也。故善人不善人之師。不善人善人之資。不貴其師。不愛其資。雖知大迷。是謂要妙。善人不善

者各有者字。善言善行。所以為計。為閉。為結之具。而善計善閉善結。乃所以為善救之具。是常善救人。即以上五者

救之也。於此則天下無不救之人。而無棄人矣。蓋潛移默運。銷之於未然。轉之於不覺。救人而無救之

之迹豈非重襲不露之天明乎。後章言是謂微明。襲明猶微明也。又云是謂襲常。襲明猶襲常也。蓋知常曰明也。夫世不藏其明者。救一人則已。欲居其功而好爲人師。人有可棄。輒顯刑其罪而幸爲已利。是皆不善救人。所以多棄人也。有道者之天明。既藏而不露。則不好爲人師。不欲以善自名也。不利他人以爲己資。不欲名人之爲不善也。如此則己雖大智。而渾然無所分別。不啻大迷。故人之視之者。亦忘乎彼之爲善。己之爲不善。此所以爲其轉移而不自知。是真聖人襲明之妙用。至要不煩。而至妙不測者也。吳氏澄曰。善行。善言。善計。善閉。善結。善救人。善救物。此七者。聖人不可名之善也。善人不善人二者。此常人兩可名之善不善也。不彰其不可名之名者。是謂襲明。不分其兩可名之名者。是謂要妙。蓋善行者以不行爲行。善言者以不言爲言。善計善閉善結者以不用爲用。則聖人之救人救物。亦以不救爲救。既以不救爲救。則無救之迹。常若什襲掩蔽而衆莫能知者。故曰襲明。非若世俗以能爲其事爲善。有迹可見。有名可稱。而與不善爲對也。是故有此之善。則必形彼之不善。而師資起矣。其去聖人善救之妙用遠矣。李氏贇曰。自謂有法可以救人。是棄人也。聖人無救。是以善救。然則無關者善閉。無約者善結。無策者善計。無譎善言。無迹善行。可知矣。蘇氏轍曰。乘理而行。故無迹。時然後言。故言滿天下無口過。萬物之數。陳於前。不計而知。安用籌算。全德之人。其於萬物如母之於子。雖縱之而不。去故無關而能閉。無繩而能約。彼挾策以計。設關持繩以御物。則力之所及者少矣。聖人之於天下。非

特容之。又兼救之。我不棄人。而人安得不歸我乎。源案蘇解襲明爲傳襲之襲。與釋氏傳燈同旨。今不取。

右第二十三章

知其雄。守其雌。爲天下谿。爲天下谿。常德不離。復歸於嬰兒。知其白。守其黑。爲天下式。爲天下式。常德不忒。復歸於無極。吳澄本知其雄至嬰兒二十三字。在知其白至無極二十三字之上。知其榮。守其辱。爲天下谷。爲天下谷。常德乃足。復歸於樸。樸散則爲器。聖人用之。則爲官長。故大制無割。無割。河上王弼作不割。此從淮南子。

李氏嘉謨曰。雄動而倡。雌靜而處。動必歸靜。故爲天下谿。白者欲其有知。黑者欲其無知。有知以無知爲貴。故爲天下式。榮者我加於人。辱者人加於我。我加於人。而人能受。則益在人。人加於我。而我能受。則益在我。故爲天下谷。然道之常。豈有所謂雌雄白黑榮辱者哉。曰。知曰守者。謂常德也。道散而爲德。以德自處。而必知所守。以復歸於嬰兒。無極與樸者。謂復歸於真常也。真常者道也。是故樸散爲器。聖人以道制器。猶不失於道。故用之爲官長焉。源案守雌。不求勝也。守黑。不分別也。守辱。無欲飽也。樸不可以一器名。及太樸既散。而後形而上之道。爲形而下之器矣。以道制器。則器反爲樸。蓋無爲而爲。自然。然而然。其視天下之理。如庖丁之視牛。恢恢乎其有餘刃。是雖宰制而未嘗割裂其樸也。道可君器。器不可宰道。此言官長。猶後章言不敢爲天下先。故能爲成器長。皆言聖人執本御末之道也。上三節言

其自末而返本。此二句言其由本而爲末。然樸雖散而不失其本。則已散如未散。聖人雖用而不離其體。則已用如未用。是則不制之制。斯爲大制。不用之用。斯爲大用也。○王氏道曰。此言聖人以無御有。微妙同玄之道。知彼守此者。知其子以守其母。知之以爲用。守之以爲主宰。雌雄以剛柔言。白黑以明晦言。榮辱以貴賤言。嬰兒言其知也。無極言其虛也。樸言其質也。皆指常德而言。變文協韻。反復吟咏。與詩體相似。非守雌爲谿之外。復有常德不離之功。常德之外。復有嬰兒可歸也。下二者倣此。蓋天下事非柔晦與賤所能獨濟者。則剛明與貴。固有時而用也。然剛不生於剛而生於柔。明不生於明而生於晦。貴不生於貴而生於賤。是剛明與貴。物之末也。去道遠者也。柔晦與賤。物之末也。去道近者也。此聖人所以旣知其子。復守其母也。守之則天下之母在此矣。其子焉往。所以爲谿爲式爲谷。而天下歸之。正以此真常之德。能不離其根也。嬰兒無極樸。實人所固有之道。故以復歸言之。樸可制爲器。而器不可爲樸。官長可統羣有司。而羣有司不可爲官長。聖人爲母不爲子。猶之爲樸不爲器。爲官長不爲羣有司。正其本而已。其本不離。則雖至剛以決天下之事。至明以燭天下之情。至貴以蒞天下之賤。然爲而不恃。長而不宰。功成而不居。夫何割之有哉。不然。逐子忌母。紛紛然與物相刃相鬪。而莫之能止。則身之不暇治。而况天下歸乎。

右第二十四章

將欲取天下而為之。之下。傅。有者字。吾見其不得已。天下神器不可為也。天下上。傅。有夫字。永。樂大典。本。器下有也字。為者敗之。執

者失之。碑本。兩者字。俱作故字。故物或行或隨。故字。蘇。或响或吹。响。釋文及王弼作歔。或強或羸。羸。王弼作挫。或

載或隳。載。傅。作接。隳。傅。作墮。是以聖人去甚去奢去泰。是以聖人。司馬。本作故聖人。

焦氏竑曰。取如左傳取我田疇而伍之。史記取高皇帝約束而紛更之之取。源案已語詞。為謂作為也。

執謂把持也。譬如陶器。不因其自然而強欲其成。必致窳敗。譬如執寶。把持不肯釋手。惟恐其失。而反

或墮墜。而况天下之器。神器乎。神器者。天命人心。去就靡常。不可人力爭。故神之也。行者不期物之隨。

而或自隨之。是不為者未嘗不得。响本期物之受。或反不受而吹之。是為者反未必得也。或強以自固。

而有時自羸。或載之甚安。而不意忽隳。是執之者未必不失也。是以聖人之待物。則去其已甚而不敢

過求。持已則去其奢泰。而不敢過望。是以爭競與盛滿之患。不生於心。未嘗謀物而物自歸之。未嘗留

物而物自不去也。薛氏蕙曰。物各有自然之性。豈可作為以害之。是以聖人去甚去奢去泰。惟因其自

然而已。聖人所譏甚奢泰者。非謂後世夸淫踰侈之事。凡增有為於易簡之外者皆是也。漢書黃霸傳。

凡治道。去其太甚者耳。其言本此。而意實不同。事有太過者去之。小而無害。則不必改作。此漢人之意

也。物有固然。不可強為。事有適當。不可復過。此老子之本意也。陸氏佃曰。去甚。慈也。去奢。儉也。去泰。不

敢為天下先也。三者聖人之所以有天下也。呂氏惠卿曰。老子言取天下常以無事。無事者因萬物之

自然而不敢爲。故能得天下之心而使之不去。非有以爲之也。惟道可以御器。天下之器神器也。非神道無以御之。神無思也。無爲也。而爲之。則御非其道矣。聖人去甚去奢去泰。凡所以輔萬物之自然。而不敢爲也。

右第二十五章

以道佐人主者。不以兵強天下。其事好還。師之所處。荆棘生焉。大軍之後。必有凶年。大軍二句。碑本無。善者果而

已。不敢以取強。博。善上有故字。已下有矣字。果而勿矜。果而勿伐。果而勿驕。果而不得已。是謂果而勿

強。諸本無是謂二。字。博。奔無謂字。物壯則老。是謂不道。不道早已。兩不道。博。奔及。碑本不道。非道。夫佳兵者不祥。物或惡之。故有道者不

處也。不祥下。他本有之器二字。傳。本佳作美。不處下無也字。君子居則貴左。用兵則貴右。君子。上。傳。奔。有是以字。兵者不祥之器。非君子之器。

不得已而用之。恬憺爲上。勝而不美。而美之者是樂殺人。夫樂殺人者。則不可以得志於天下矣。恬憺爲上。故不美也。若美必樂之。樂之者是樂殺人也。夫樂殺人者。吉事尙左。凶事尙

六句。博。奔本作以恬憺爲上。故不美也。若美必樂之。樂之者是樂殺人也。夫樂殺人者。吉事尙左。凶事尙

右。是以偏將軍居左。上將軍居右。言以喪禮處之。吉事上。傳。奔。有故字。偏將軍上。王弼。河上無是以二字。

弼。河上無居上勢。則四字。今從之。殺人衆多。以悲哀泣之。衆多。河上。王弼。作之衆。傳。奔。衆。戰勝則以喪禮處之。戰勝下。傳。

二。字。處之。吳澄。作主之。晁氏。說之。曰。王弼。老子。注。謂兵者不祥之器。以下至末。皆非老子本文。王氏。道

曰。自兵者不祥之器。以下。似經注相間。疑古之義。疏。混入經文者。姚氏。曰。物壯則老。十二字。當爲衍文。

天道好還。則以兵強天下。非知道者也。以道佐人主者。尚不可。而况人主躬於道者乎。下奪民力。故荆棘生。上違天時。故有凶年。所謂善者。卽有道者也。矜者自恃。伐者夸大。驕者恣肆。三病一源。知其不可。而能自克者。非果斷不能也。故歷言當果之數事。以曉之。五而字當讀若於字。古而如通用。聲近義同。人皆果於彼。我獨果於此也。物壯則老。此天道也。而違之者。是不道矣。宜其暴興者必早已也。古佳字無訓美者。或謂當是惟字之省。昶按王石臚言。夫佳乃夫惟之誤。惟字爛脫左小。遂寫誤而爲佳。其說良是。然漢人已有佳兵不祥之語。則作佳兵亦古本也。或謂當用廣雅佳勞也之訓。義皆可通。然傅奕本直作美兵。則是以佳爲嘉之借文。與下文一意也。左爲陽爲生。右爲陰爲死。故吉凶異尚。恬者不懽。愉者不醜。厚謂非其心之所喜好也。○李氏嘉謨曰。殺人之父。人亦殺其父。殺人之兄。人亦殺其兄。是謂好還。兵幸而勝。其殺氣之應。地不能使之生。天不能使之和。則其不勝者可知矣。故善戰者。因其不得已。果於一決。而不以是取強。果者不久之謂也。內持不得已之心。而外爲一戰之決。故未嘗矜。未嘗伐。未嘗驕。未嘗強。皆生於不得已也。若得已而不已。兵老而氣衰。猶人壯之必老也。人之不道。尚猶不盡年而死。況於兵之老乎。然則仁者無敵之道可知已。蓋不樂殺人而後可言兵。孫吳之論兵。審虛實。辨奇正。其言詳矣。然虛實奇正之本。孫吳未必知之。老氏云。恬憺爲上。勝而不美。是固不欲戰之意。然卽以兵法論之。恬憺則靜。靜者勝之本也。狂躁則動。動者敗之基也。孟子曰。不嗜殺人者能一之。自古至今。天道有或爽者哉。

右第二十六章舊分不道早已以上爲一章以下爲一章今從吳澄姚鼐本合之

道常無名。樸雖小，天下莫能臣。有也。字河上作不敢。臣此從傳。奔本。侯王若能守，字下一本萬物將自

賓。侯王梁武傳奔作王侯。萬物熊竑云一作天下。天地相合以降甘露，人莫之令而自均。均下有焉字。始制有名，名亦既有，夫亦

將知止。知止所以不殆。譬道之在天下，猶川谷之於江海。與又未有也。字。

道，卽所謂常道也。道以無名爲常，故但可名以無名之樸而已。樸之爲物，未瑀未琢，其體希微而不可

見，故無名。然天地之始，萬物恃之以生，則天下孰敢臣其所自生，與其所自始者哉？侯王若能守，是見

小曰明者也。知子守母者也。守之以主萬物，而萬物有不賓者乎？譬猶陰陽交和，成雨露以生萬物，雖

無人使令之，而自溥徧。侯王執道紀，莫之令而萬物自賓，亦猶是耳。夫侯王之守樸，守其無名者而已。

守其無名，始可以制有名。制者，裁其樸而分之。禮樂政刑，皆自取也。然苟逐末而忘本，將愈遠而失宗。

是故無過恃，無多求，仍貴其止。止者，鎮之以無名之樸而已。由無名以制有名，故器以生，復以有名守

無名，故樸不散。夫何不知常，妄作凶之有？是故道之在天下，猶水之在江海，自本而末，末而不離其本

也。爲侯王者，可不守樸以御物乎？吳氏澄曰：始者道也，有名者德也。道之無名而爲德，則名亦既有矣。

故人之用此名者，當知止於德，不可徇末而愈遠也。將者辭之，不迫者也。蘇氏轍曰：樸，性也。其道常無

名，故其爲物舒之無所不在，而斂之不容豪末。此所以雖小而不可臣也。故匹夫之賤，守之則足以陶

鑄堯舜而侯王之尊。不能守則萬物不賓矣。沖氣升降相合爲一。以降甘露。脂然被於萬物而無不均。徧聖人體至道以應諸有。亦猶是也。此所以能賓萬物也。聖人散樸爲器。因器制名。豈其徇名而忘樸。迷末而喪本哉。蓋亦知復於性。是以乘萬變而不殆也。李氏嘉謨曰。天地有合。以降甘露。而生萬物。由是觀之。天地雖判。不必離。雖道散爲物。物各有名。而道未嘗棄物也。惟物不自棄於道。則其立於天地之間而不殆者。以道猶生之也。故人能知止於樸。則物不以道散而虧。道不以物生而散。猶川谷之氣。未嘗不通於江海。江海之氣。未嘗不通於川谷。本與末未嘗一日而不循環也。彼徇末而離本者。烏足以知之。

右第二十七章

知人者智。自知者明。勝人者有力。自勝者強。知足者富。強行者有志。傳奕本每句末有也字。葉夢得本力上無有字。不失其所者久。死而不亡者壽。邵若愚本。所下有止字。

呂氏惠卿曰。知常曰明。則明者固智之所自出也。不能自反。非所以知常。能知常則於知人乎何有。守柔曰強。則強者固力之所自出也。不能自克。非所以守柔。能守柔則於勝人乎何有。有自知之明。則知萬物皆備於我。而無待於外慕。故富矣。有自勝之強。則於道勤而行之。不阻奪於外變。故有志矣。知其足於己而強行之。則能存其所存。而不爲物之所遷。故曰久。能存其所存。則雖死而未嘗亡也。故曰壽。

張氏爾岐曰。智力明強。各以內外對言。久與壽。以不變於生。不亡於死對言。不失其所。死而不亡。皆守常道之效也。李氏嘉謨曰。精神在外為智力。在內為明強。人所以不能入道者。以自見不明。而為物所勝也。若內明則自不驚外。不驚外則漸能勝物。積日既深。自然入道。知足而智益明。強行而力愈固。修悟兩全。漸反其性。虛中證實。所得不移。是之謂不失其所。等視死生。有如旦暮。無古無今。浩然常在。是之謂壽。吳氏澄曰。老子之道。以昧為明。以弱為強。而此章貴明強者何也。曰。老子內非不明。外若昧耳。內非不强。外示弱耳。其昧其弱。治外之藥。其明其強。守內之方。其實一事也。

右第二十八章

大道汜兮。其可左右。萬物恃之以生而不辭。汜。傳奕作汎。以生。河上王弼作而生。功成不名有。衣養萬物而不為主。不名有。傳奕作

而不屑。衣養作衣被。河上作愛養。此從王弼本。常無欲。可名於小。萬物歸焉而不知主。可名於大。可名於小。可名於大。傳奕作末。各有矣字。歸焉作歸之。不知主。

王弼作不為主。可名於大。傳奕作是以聖能成其大也。以其不自大。故能成其大。河上作終不為大。王弼作以其終不自為大。

萬物恃之以生而不辭。此指道之費者而言。所謂用之廣也。功成不名有。此指道之隱者而言。所謂體之微也。惟其體之微。故有衣養萬物之功。而不名有。返之於無形無名。斂之不盈毫末矣。惟其用之廣。故萬物恃之以生者。咸歸往而浩浩。不知其專主。極之並育不害。其量可彌六合矣。然則常無欲。可名於小者。樸之小。而可以觀妙也。體也。萬物歸往。可名於大者。萬物將自賓。而可以觀微也。用也。方其小

則不見其朕。及其大則物莫能外。是以體道之聖人亦然。終守其樸之小。不肯自大。而萬物皆歸之。以是知大道非可以人力爲者也。蘇氏轍曰。汜兮無可無不可者。大道也。世有生物而不辭者。則將名之以爲己有。世有避功而不有者。則必辭之而不生。生而不辭。成而不有者。惟道而已。大而有爲。大之心則小矣。呂氏惠卿曰。惟其功成不居。故不爲主而常無欲。無欲則妙之至者也。可名於小矣。惟其萬物恃之以生。故皆歸焉而不知主。則容之至者也。可名於大矣。夫既小而可名於大。既大而可名於小。則是不可名大名小也。此道所以隱於無名也。而聖人以無名體之。終不自大而大莫加焉。蓋惟其可左可右。是以非小非大。惟其非小非大。故能成其大。

右第二十九章

執大象。天下往。大象下傳。奕有者字。往而不害。安平泰。平泰河上。樂與餌過客止。道之出口。淡乎其無味。視之不足見。聽之不足聞。用之不可既。出口碑本作出言。淡乎傳奕作淡兮。不可既王弼作不足既。傳奕聽之用之下。皆作不可。此從河上本。

吳氏澄曰。大象喻道。下章大象無形。道隱無名是也。林氏希逸曰。大象者無象之象。天下往者。執此而往。行之於天下也。呂氏惠卿曰。平者安之至。泰者平之至。安平泰者。安其夷泰也。李氏嘉謨曰。愚者往而不返。有道者往而不害。往而不返者。舍道而從物也。往而不害者。與道俱也。既與道俱。往不離道。則無所不安。無所不平。無所不泰。其於形器。猶逆旅之寄寓耳。苟以樂餌之故。留戀而不去。未有不爲患。

者。故聖人執大象而往。雖從於物。常與道俱。味無味之味。視無色之色。聽無聲之聲。故能用無用之用。即於形器之間。全收道用。此其所以安平泰也。源案執大象天下往者。如文中子如有用我。執此以往之意。蓋聖人有大象。東西南北無不可執。此以往。所謂抱一以爲天下式也。隨其所往。安於平泰而不害。此道之用不可既也。然大象無象。出聲色臭味之外。非若美樂厚餌之物。有味可味。有聲色可觀聽也。乃淡乎希微。而無用之用。其用不窮。蓋惟無濃醜之趣者。故亦無傾危之患。若夫有宴安之適者。則必有酖毒之害矣。即以樂與餌譬之。如雅樂於鄭聲。五穀之與肥旨。淡者和心而養人。濃者蕩神而爽口。是有可欲。即有所害。其用必窮。無可欲亦無所害。其用不既。故無味之味。是爲至味。終身甘之而不厭。希聲之聲。是爲大音。終身聽之而不煩。無象之象。是爲大象。終身執以用之而無害。推之蠻貊而可行。放乎四海而皆準。所謂天下可往者。此之謂也。

右第三十章

將欲歛之。必固張之。釋文。歛作翕。或又作給。王弼作儻。河上作翕。將欲弱之。必固強之。將欲廢之。必固興之。將欲奪之。必固與之。是謂微明。柔勝剛。弱勝強。柔勝二句。王弼河上作柔弱勝。剛強。傅奕兩勝上各有之字。魚不可脫於深淵。脫。傅奕作脫。各本無深字。邦之利器。不可以借人。各家邦作國。避漢諱改也。此章皆從韓非子。惟末句借字。各家皆作示。此從說苑君道篇所引。

此言君子待小人之術也。柔勝剛。弱勝強。是其本旨。魚與利器皆喻也。蓋將欲如彼者。殺機也。必固如

此者密用也。魚不可脫於淵，喻必然之密用不可失。失則非柔弱矣。利器不可示人，以喻將然之殺機不可露。露則不善用其剛強矣。水最柔弱，人之有道如魚之有水，兵器最鋒利，事之有機如國之有利器。柔弱者其體，剛明者其用。然魚無一時可離於水，此聖人柔道藏身之固，而守以終身者也。利器有用有不用，此聖人智勇深沈之機，而慎於臨時者也。非明不能見，非微明不能守，故切譬以明之。蓋惡不積不足以滅身，聖人待小人常因天道之自然而不費人力。若太王事獯鬻，文王事昆夷，句踐事吳，以及張良之待秦項，漢文帝之待佗，漢亦皆是也。是故有權宜以待小人，如有網罟以待禽獸，亦自然之理。如必以徑情直行爲得，則是伏羲不應作網罟，行軍不應好謀而成也。尺蠖屈以求伸，龍蛇蟄以存身，天之道，人之理，物之勢，未有不如此者。與易之消息盈虛一理也。或曰：示人當從說苑作借人，蓋予奪翕張之術，聖人以除暴銷惡，而小人亦借之以行其私。陰符經云：其盜機也。天下莫能見，莫能知。君子得之固躬，小人得之輕命，此不可借人之謂也。王氏弼曰：將欲除強梁，去暴亂，當以此四者因物之性，令其自斃，不大假刑爲之力也。故曰微明，足其張，令其足而又求其張，則衆所歛也。苟其張之未足而治之，則其機未極而已反危。蘇氏轍曰：未嘗與之而遽奪，則勢有所不極，理有所不足，勢未極則取之難，理不足則物不服。此其極深研幾，與管仲孫武無異。蓋聖人乘理而世俗用智也。乘理如醫藥，巧於應病，用智如商賈，巧於射利。是故天下之剛強相傾相軋，而吾獨以柔弱待之。及其大者傷，小者

死而吾以不校坐待其斃。聖人豈有意爲此以勝物哉。知勢之自然而居其自然耳。魚之爲物非爲爪牙之利足以勝物也。然方託於深淵。雖強有力者莫能制之。聖人居柔弱而剛強莫爲傷。亦猶是也。非徒莫能傷。又將以全制其後。此不亦天下之利器也哉。彼衆人烏得而知之。王氏道曰。造化有消息盈虛之運。人事有吉凶倚伏之理。故物之將欲如彼者。必其已嘗如此者也。將然者未形。已然者可見。能據其已然而逆睹其將然。非微明不能。然微而明可也。明其微不可也。是故韜此理以自養。深靜斂退。優柔自得。如魚之不脫於淵是也。炫此理以示人。啓釁招尤。借寇誨盜。如以邦之利器示人。則非也。莊子胠篋篇實明此意。蓋聖人用之。則爲大道。奸雄竊之。則爲縱橫捭闔之術。其言有甚於兵刃也。故聖人不以利器示之。吳氏澄曰。老子言反者道之動。又謂玄德深矣遠矣。於物反矣。其道大抵與世俗之見相反。故借此數者相反之事爲譬。而歸於柔勝剛弱勝強之旨。孫吳申韓之徒。用其權術陷人於死而不知。論者以爲皆原於老氏之意。遂謂天下誰敢受老氏之與者哉。是亦立言之弊。故邦之利器不可以示人。老子已自言之矣。

右第三十一章

道常無爲而無不爲。侯王若能守。萬物將自化。爲與化韻。化讀如訛也。侯王。傳奕作王。侯若能守。河上王弼作能守之。化而欲作。吾將鎮之以無名之樸。鎮下。焦竑無名之樸。夫亦將無欲。各本無夫字。釋文作不欲。此從王弼本。無欲以靜。天下將自正。靜。傳奕作靖。正。或作定。

蘇氏轍曰。道常者。無所不爲而無爲之之意耳。聖人以無爲化物。萬物化之。始於無爲。而漸至於作。譬如嬰兒之長。人僞日滋。故三代之衰。人情之變。日以滋甚。方其欲作。而上之人與天下皆靡。故其變至有不可勝言者。苟其方作而不爲之動。終以無名之樸鎮之。庶幾可得而止也。呂氏惠卿曰。老子真人也。宜不弊弊焉。以天下萬物爲事。而於侯王如此諄諄何也。道以修之身爲真。以修之天下爲普。使侯王者知而守之。則修之天下。不亦普乎。夫不嗇其道。而欲與天下同之。則莫先於侯王者矣。此老子之仁也。源案化而欲作以下。說者多失之。蓋欲作者。欲生萌動也。夫萬物自化。則任其自生自息而已。自生自息。而氣運日趨於文。將復有欲心萌作於其間。苟無以鎮之。則太古降爲三代。三代降爲後世。其誰止之。然鎮之亦豈能有所爲。亦鎮之以無名之樸而已。無名之樸者。以靜鎮動。以質止文。以淳化巧。使其欲心雖將作焉而不得。將釋然自反而無欲矣。無欲則靜。靜則正。而返於無名之樸矣。所謂我無欲而民自樸。我好靜而民自正。無名之樸。重言協韻以起下文耳。夫亦將無欲。猶前章夫亦將知止。皆詞之不迫者也。諸家或無夫字。或作不欲。故其說謂聖人並此無名之樸。亦不欲存之於心。夫苟爲聖人所不欲。尙何謂無名之樸乎。此皆禪家隨手掃除之機。非黃老清靜自然之旨也。惟姚氏有云。夫亦將無欲。言使夫人皆無欲也。斯言得之矣。

下篇

上德不德。是以有德。下德不失德。是以無德。上德無為而無不為。下德為之而有以為。上德句河上作無為而無以為下德

句傳奕作為之而無以為此從韓非子上仁為之而無以為。上義為之而有以為。上禮為之而莫之應。則攘臂而扔之。扔仍

本或作仍故失道而後德。失德而後仁。失仁而後義。失義而後禮。韓非子四而後下俱有失字夫禮者。單以虛詞發端老子

無此句法上下篇但云夫惟不單云夫也夫乃失之誤失禮者句忠信之薄而亂之首也。前識者。道之華

而愚之始也。兩也字王是以大丈夫處其厚不處其薄。居其實不居其華。故去彼取此。王弼作處其厚不居其薄處其實不

居其華傳奕四句並作處此從河上本

無以為。以用也。攘。古讓字。扔。古通作仍字。言再推讓而就之也。仁義禮智皆下德。故皆言上而不言下。

蓋推極言之以明其分際也。上德近乎道。故無為而無不為。上仁近乎德。故為之而無以為。至義則雖

其上者亦真下德矣。故為之而有以為。禮則又德之下者。故為之莫應。又推讓而就之。此不失德而無

德之極也。吳氏澄曰。老子上篇首章分言道德而未明言之。下篇首章乃分言道德仁義禮智。皆宗旨

所在也。蓋吾儒以道德為統名。分言之則為仁義禮智。皆得於天為性之固有。初無精粗之別也。老子

則以道爲無名。德爲有名。自德而爲仁。義禮智。每降愈下。故此章以德之近道者爲上德。仁之近德者爲上仁。義之近仁者爲上義。禮之近義者爲上禮。又於禮之後言前識。以智爲下也。其以厚薄華實爲言。蓋道猶木之實。生理在中。胚胎未露。既生之後。則德其根。仁其幹。義其枝。禮其葉。而智其華也。道實智華。實實而華虛。德根禮葉。根厚而葉薄。故曰禮者忠信之薄。前識者道之華。而大丈夫寧守此道德之厚實。而去彼禮智之華薄也。王氏弼曰。上德之人。惟道是用。不德其德。無執無用。故雖德而無德名也。下德主善名以治物。故德名有焉。善名生而有不善。應故不失德而無德也。無以爲者。無所偏爲也。夫大之極者。其爲道乎。失道而後德。極下德之量。至於上仁而止。雖以無爲爲用。不能以無爲爲體也。以無爲爲用。猶得其母。故已不勞而物自理。下此以往。則不能無爲而貴博施。不能博施而貴正直。不能正直而貴飾敬。夫仁義發於內。而爲之猶僞。况務外飾而可久乎。夫仁德之厚。非用仁之所能也。義行之正。非用義之所成也。禮敬之清。非用禮之所濟也。苟得其爲功之母。載之以大道。鎮之以無名。則志無所營。事用其誠。仁義禮敬皆道也。苟舍母而用其子。棄本而適其末。名則有所分。形則有所止。雖極其大。必有不周。雖盛其美。必有憂患。太上所不取矣。蘇氏轍曰。德有上下。而仁義有上無下何也。下德在仁義之間。而仁義之下者不足。復言故也。忠信之人。可以學禮。禮立而忠信之美。發越於外。其中竭而無餘。故在上者爲之。而下不應。至於攘臂而強之。強之而又不應。將刑罰生而兵甲起。則徒作而

無術矣。是忠信之薄而亂之首也。焦氏竑曰：首亂始愚。極言禮智流弊所至耳。莊子舉老子此語而論之曰：匿而不可不為者事也。遠而不可不居者義也。親而不可不廣者仁也。節而不可不積者禮也。中而不可不高者德也。一而不可不易者道也。是數者雖有上下先後之異。而以聖人用之皆道也。如此則豈復有彼此去取邪。

右第三十三章

昔之得一者。天得一以清。地得一以寧。神得一以靈。谷得一以盈。萬物得一以生。侯王得一以為天下貞。

傳奕作其致之一也。河上王弼無天無以清將恐裂。地無以寧將恐發。神無以靈將恐歇。谷無以盈將恐竭。

嚴君平無萬物得一以生萬萬物無以生將恐滅。十四字侯王無以貞而貴高。將恐蹶。河上無貞故貴必以賤

為本。高必以下為基。淮南子及河上本是以侯王自稱孤寡不穀。此其以賤為本邪。非乎。自稱下河上

作自謂此其作是其非故致數與無與。與河上作車傳奕作至譽不欲瑋瑋如玉。落落如石。瑋瑋傳奕作

平作非歟王弼作此非反者道之動。弱者道之用。天下萬物生於有。有生於無。天下萬物傳奕作

作若若字落落王弼吳氏澄曰：一者冲虛之德。前後所謂抱一。所謂混為一。所謂道生一。皆指此。莊子又謂之太一。此自然

之德。其用則虛而不盈。後而不先。柔而不剛。弱而不強。書中固屢言之。而此章盡發其蘊。得者謂得此

一以為德也。天地谷神四者名異實同。裂破裂也。發發泄震動也。歛銷而不靈。竭枯而不盈。滅息而不

生。蹶。顛。仆也。貞與楨同。貞者事之幹。爲天下貞。猶言爲民極也。老子著書。將以導世。故下文專爲侯王言之。先言賤爲本。下爲基。而後但言賤爲本者。省文也。上文得一已專言用弱矣。而末後以反與弱對言者。蓋反推所以弱之原。弱指所以反之實。凡言反者。卽欲用弱。言弱者。卽是與羣動諸有相反。非弱之外。又有所謂反也。道之靜本無。故動則常與相反。無之體虛。故其用常以弱爲事。蓋物生於氣。氣生於道。氣形有而道則無。此有無所以相反也。王氏弼曰。清不能爲清。盈不能爲盈。皆有其母。乃存其形。故清不足貴。盈不足多。貴在其母。而母無貴形。是貴乃本乎賤。故致數與乃無與也。玉石瑒瑒。瑒瑒體盡於彤。故不欲也。夫高以下爲基。貴以賤爲本。有以無爲用。此其反也。動皆知其所無。則物通矣。故云反者道之動也。李氏嘉謨曰。所謂一者何也。知天之所以清。卽知地之所以寧。知神之所以靈。卽知谷之所以盈。知萬物之所以生。卽知侯王之所以爲天下貞。蓋極其致。皆有生於無也。是未嘗不一也。若不知一。則必自異。自異則必絕物。侯王絕物。物亦絕之矣。李氏贊曰。侯王不知致一之道。與庶人等。故不免以貴自高。高者必蹶。下其基也。下則能賤矣。何則。致一之理。庶人非賤。侯王非貴。今夫輪輻蓋軫。衡輓會而成車。人但知其爲車。而不知其爲數者所會而成。初無所謂車也。由是推之。侯王庶人。人但見其有貴。有賤。有高。有下。而不知其致之一也。彼據其所見之形迹。貴而不能賤者。則亦瑒瑒落落如玉石而已。然則欲知反而弱者。無他。致一以極乎無而已。陳氏懿典曰。致也。故其至也。數車無車。自有

而數至於無謙之至也。瑒瑒落落皆堅確而不能柔弱之意。謙之反也。源案莊子稱老子之學建之以常無有主之以太一。以濡弱謙下爲表。此章所謂得一者。卽沖虛不盈之德。爲其近乎無也。又以侯王自稱孤寡不穀明之。爲其近乎一也。夫天地萬物皆有生於無。故天不自知其清。地不自知其寧。神不自知其靈。谷不自知其盈。萬物不自知其生。則侯王亦不自知其貴高。明矣。不自知其清寧者。無心而運。無爲而成也。不自知其爲靈與盈者。寂而虛也。不自知爲生者。自然也。不自知爲貴高者。賤下也。寂故靈虛故盈。無心無爲故清寧。自然故不期生而生。自賤自下故爲天下貞。此則得一之所致也。夫貴高與賤下相反。而一之者何哉。蓋所謂侯王者。亦人見之爲侯王耳。若推其極致。則積衆賤而成貴。分數之初。無貴之可言。積衆下而成高。分數之初。無高之可言。如會衆材而成車。分數之本。無車之可言。至於無貴賤高下之可言。則豈但以賤爲本下爲基而已邪。蓋并我而無之矣。無我則無物。無我無物。則無高無下。無貴無賤。如此則高與下一也。貴與賤一也。彼與我一也。無往而不無。則無往而不一。何怪其與玉石之硜硜堅強自異於物者相反哉。然則人之見其相反者。道之動也。人所見其弱者。乃道之用也。蓋動本於靜。有本於無。不獨車之體生於無。卽天地谷神萬物之體亦生於無。無與有相反。故體道者亦與徇有者相反。徇有者強而體無者弱。不能體其無。雖欲守柔而不能也。故有我無我之間。此得一不得一之所由別也。

右第三十四章河上本分璋璋落落以上為一章反者四句為一章今案後章言能受國之垢是為社

之反者道之動此語意相承之明證而數與無與即有生於無之旨必合為一章而後義備至吳氏澄

以末四句通下二章為一章義雖可通文殊不屬姚氏薰又通此章及下章為一章又移後章道生一

至沖氣以為和二十五字於此章之首而移此章貴以賤為本至非乎二十

九字於後章人之所惡之上謂皆錯簡則臆斷無稽且不明道德之本旨耳

上士聞道勤而行之中士聞道若存若亡下士聞道大笑之不笑不足以為道故建言有之傳奕本動在

有而字建言有明道若昧進道若退夷道若類傳奕進道句在夷道句下上德若谷大白若辱廣德若不

足建德若偷質真若渝大方無隅廣德吳澄作廣得偷轉如輪與渝隅為韻傳奕偷作始大器晚成大音

希聲大音傳奕大象無形道德無名夫唯道善貸且成

吳氏澄曰此詳言上章反者道之動也道與物相反故知之者眇非上士不能信也建言有之以下十

二事皆道之與物相反者也源案明道三句言其體道也上德五句言其成德也大方四句又廣喻以

贊之類說文云絲節左傳刑之頗類注謂不平也王弼謂大夷之道因物之性不執平以削物是也地

方不中矩安有隅天容不可繪安有形非全道者烏能若此邪陸氏希聲曰形而上者謂之道形而下

者謂之器道也者通乎形外者也上士知微知彰故聞道而信則勤行之中士在微彰之際故聞道而

疑信相半下士知彰而不知微止乎形內故聞道大笑笑之則非之矣古之善為道者微妙玄通深不

可識苟不為下士所笑則不足以為道矣李氏嘉謨曰上士之勤非強勤也有見而勤下士之笑非故

笑也。無見而笑。上不至於勤。下不至於笑。不能無見而又不能信其所見。雖欲不若存若亡不可得也。明道者自明。非光之明。外不得而見。故若昧。進道者自進。非力之進。外不得而知。故若退。大白不污其性。苟性不污。和其塵可也。故若辱。廣德必有見於大。苟見於大。雖欲使之止不可得也。故若不足。建德者內立自性。則接物必簡。故若惰。質真者不徇於外。則惟吾所之。故若變。夫然則非廉隅可得而察也。非成不成可得而盡也。非聲音可得而知也。非形器可得而執也。彼中下之士。方役其所見。而議吾之迹。以實昧實。退實類實。辱實淪。其不侮笑者幾希矣。呂氏惠卿曰。謂之明而若昧。謂之進而若退。謂之夷而若類。以至音而希聲。象而無形。名與實常若相反者也。然則道之實蓋隱於無矣。惟其如此。故既以爲人。已愈有。既以與人。已愈多。推其有餘。以貨物之不足。而無不賴之以曲成也。

右第三十五章 吳澄本連上文反者道之動及下文道生一以下通爲一章今不取

道生一。一生二。二生三。三生萬物。萬物負陰而抱陽。沖氣以爲和。淮南子作背人之所惡。惟孤寡不穀。而王公以爲稱。傳奕作人之所患而王公以自稱也故物或損之而益。或益之而損。一本下句無或字人之所教。我亦教之。強梁者不得其死。吾將以爲教父。傳奕作人之所以教我亦我之所以教人又教父作學父王弼作人之所教我亦義教之天下之至柔。馳騁天下之至堅。無有入於無間。王弼無於字傳奕作出於無有入於無間吾是以知無爲之有益也。不言之教。無爲之益。天下希及之。吾是以句一本無吾字傳奕無也字末句有矣字此四句並從淮南子

吳氏澄曰。此詳言弱者道之用也。萬物之生。以此沖氣則既生之後。亦必以沖氣爲用。乃爲不失其所。以生之本。沖氣虛而不盈。故曰弱。此言道所以弱而動之由也。王公稱孤寡不穀。此言人之能體道者也。弱者損之也。強者益之也。以強梁勝人之益。而有不得其死之損。則所謂益之而損者。非歟。以至柔無有之損。而有馳騁能入之益。所謂損之而益者。非歟。然則宜弱不宜強。強梁之爲教。不待言而明。是真不言之教矣。至柔無有之馳騁能入。其有益如此。是真無爲之益矣。視彼以有言爲教。有爲爲益者。豈可同日語哉。故曰希及之。張氏爾岐曰。此章首承上章。夫惟道善貸。且成而言。道生一。一生二。無名。天地之始也。二生三。三生萬物。有名。萬物之母也。一謂氣。二謂陰與陽。三謂陰與陽會和之氣。卽所謂沖氣也。萬物負陰而抱陽。沖氣以爲和。卽申說三生萬物也。蘇氏轍曰。夫道非一非二。及其與物爲偶。道一而物不一。故以一名道。世之人不知萬物之所自生。莫不賤寡小而貴重大。然王公之尊而自稱孤寡不穀。古之道者。蓋已知之矣。焦氏竑曰。凡動物背止於後。陰靜也。耳目口鼻居前。陽動也。植物背寒向煖亦然。故曰萬物負陰而抱陽。而沖氣則運於其間也。木絕水曰梁。負棟曰梁。皆取其力之強。金人銘曰。強梁者不得其死。蓋古有是語。而老子取之。故曰我亦教之也。母主養。父主教。故言生則曰食母。言教則曰教父。馳騁役使也。不曰剛強而曰至堅。變文叶韻也。王氏弼曰。水無不可往。氣無所不入。柔弱虛無。無所不通。至柔不可折。無形不可窮。以此推之。故知無爲之益也。李氏嘉謨曰。方其爲道。

則一亦未生安得有二。及其有陽卽有陰。有陰陽則又有陰陽之交。而無不有矣。萬物抱陽一也。負陰二也。陰陽交而沖氣爲和三也。萬物孰不具此三者乎。由其本生於道。故末而不失其本。孤寡不穀。王公自稱。蓋損之生益也。強梁不得其死。蓋益之生損也。夫惟損益同源。故損則必益。益則必損。聖人以孤寡不穀爲稱。蓋欲人知強梁之取死也。皆所以爲教也。物本非物。堅者僞體也。雖至堅之極。必歸於無。以天下之至柔。能馳騁天下之至堅。況損之又損。以至於無。則無之真。豈不足以破有之僞乎。故無有能入無間也。無爲之爲。其爲以道。不言之教。其教以天。故未有及之者矣。源案此章原弱所以爲道之用者。全在沖氣爲和一言。蓋沖和之氣。未有不柔弱者。故人之生也。柔弱而死也。堅強草木之生也。柔弱其死也。枯槁。凡乖戾不和之氣。則堅強矣。故萬物之生。必常不失此沖和之氣。而後得天之生道。反是則死道矣。前章弱者道之用。而申之以天下萬物生於有。有生於無。此章正承其指。故書中凡言含德之厚。則比於赤子。專氣至柔。則必如嬰兒。皆體道貴弱之旨。乃張爾岐疑其有脫文。姚氏鼎直指爲錯簡。皆不識夫言之宗。事之君者也。

右第三十六章。河上分天下至柔以下別爲一章。今按上文損益分擊。末語不言無爲分承。文義顯然。吳澄合之是也。又按侯王孤寡不穀。正與得一章首尾相應。尤可證此與上章皆發明得一章之旨也。

名與身孰親。身與貨孰多。得與亡孰病。是故甚愛必大費。河上無是故二字。王弼有。多藏必厚亡。知足不辱。知止不殆。

可以長久

身親為韻。貨多為韻。藏亡為韻。足辱為韻。止殆久為韻。首二句名在。身上貨在。身下者。協韻耳。

司馬溫公曰。得名貨而亡身。與得身而亡名貨。二者孰病。王氏弼曰。得名利而亡其身。何者為病也。甚愛不與物通。多藏不與物散。則求之者多。攻之者至矣。故大費厚亡也。薛氏蕙曰。知足者樂。今有之已多。無求者也。無求奚辱。知止者懼後進之有損。知幾者也。知幾不殆。張氏爾歧曰。貪夫徇財。烈士徇名。知有名利。不知有身。抑思身與名貨孰親孰多乎。以彼易此。孰得孰失。必有能辨之者。故甚愛啓爭。多藏誨盜。至是而始悟名之為身累也。貨之為身賊也。得之不償所亡也。亦已晚矣。惟君子能早知之。易止易足。斯不殆而可長久耳。源案甚愛以下。即承得與亡而通言人世得失之理也。呂惠卿以甚愛多藏分屬名貨。以大費厚亡指身而言。皆失之鑿矣。

右第三十七章

大成若缺。其用不敝。

河上王弼作蔽。

大盈若沖。其用不窮。大直若屈。大巧若拙。大辯若訥。躁勝寒。靜勝熱。清靜為

天下正。

傳奕本盈作滿。沖作盅。屈作詘。靜作靖。末句清靜上有知字。下有以字。

吳氏澄曰。以成為成。以盈為盈。以直為直。以巧辯為巧辯。小矣。若缺則非成。若沖則非盈。若屈則非直。

若拙若訥。則非巧辯。乃為成盈直巧辯之大者也。大抵相反而相為用。前章屢見。皆此意也。陽之躁勝

陰之寒。陰之靜勝陽之熱。亦相反而相為用也。正猶正長之正。猶言為天下君也。夫為天下之君者亦

多事矣。然弊弊然有為者，反不若清靜者之無為而無不為。故能為天下正。反者道之動如此。人之徇有而忘本者，可以悟矣。蘇氏轍曰：直而不屈，其屈必折；循理而行，雖屈亦直。巧而不拙，其巧必勞。付物自然，雖拙而巧；辯而不訥，其辯必窮。因理而言，雖訥而辯。葉氏夢得曰：寒暑者天地之氣也，有人於此，躁猶可以勝寒，靜猶可以勝熱，而況自然無為之清靜，其尙不足以制天下之動而貞夫一者乎？則缺勝成，冲勝盈，屈勝直，拙訥勝巧，辯從可知矣。世人不察此，力求勝物而愈莫能勝，清靜正天下，以不勝勝之也。

右第三十八章

姚鼐移靜勝寒三句於以正治國章之首，或又謂此三句當屬下章，蓋正糞為韻，而有道卻走馬，即清靜治天下之效也。姑存其疑。

天下有道，卻走馬以糞。糞，傳突作播，古字通。張衡西京賦：卻走馬以糞車。張協七命：亦用糞車。朱子及吳澄並稱之，謂車郊協韻。然韓非子淮南子鹽鐵論引此，並無車字。河上王弼諸本

皆同。故仍其舊。天下無道，戎馬生於郊，罪莫大於可欲。王弼本無罪莫大句。禍莫大於不知足，咎莫大於欲得。傳突本，咎莫

澄此句在禍莫大句之上。故知足之足常足矣。司馬本無之足二字，又無矣。字，韓非子作知足之為足矣。

王氏弼曰：天下有道，知足知止，無求於外，各修其內而已。故卻走馬以糞田也。貪欲無厭，不修其內，各求於外，故戎馬起於郊也。李氏嘉謨曰：有道則能使兵為民，無道則能使民為兵。可欲者愛也，不知足者取也，欲得者有也，由愛生取，由取生有，遂為無窮之咎。觀不知足者雖足而不足，則知足之足常足也可知矣。

右第三十九章

不出戶。知天下。不窺牖。見天道。淮南子戶牖下有兩以字。韓非子作不出於戶。可以知其出彌遠。其知彌

少。傳奕彌作闕。少作越。諸本無者字。此從韓非淮南子。是以聖人不行而知。不見而名。不為而成。不行而知。知或作

呂氏惠卿曰。天下之所以為天下。天道之所以為天道者。果何邪。得其所以然者。則不出戶窺牖而知見之矣。如必待出而後知之。則足力目力所及幾何。聖人知天下之所以為天下。故不行而知。見天道之所以為天道。故不見而名。夫何故。以其備於我故也。知之於所不行。名之於所不見。則不為而成矣。李氏嘉謨曰。出而求天地者。求其形也。天地不可以形盡。而可以理盡。故其出彌遠。其知彌越。若知其理之在此。雖閉戶可也。聖人知不在形。故不必行。名不在迹。故不必見。成不在事。故不必為。吳氏澄曰。其出彌遠。其知彌少。不復言見與闕者。知天下則知天道也。不為而成。言上二句之效。

右第四十章

為學日益。為道日損。兩日上。傳奕各有所字。損之又損。以至於無為。又損下河。無為而無不為矣。傳奕作無為。則無不為。故取

天下者。王弼無故者二字。傳奕常以無事。及其有事。不足以取天下。不足。河上作不可。傳奕作又不足以取天下矣。

李氏嘉謨曰。為學所以求知。故日益。為道所以去妄。故日損。損不極則知不全。故日損者所以為日益也。若損之又損。妄去真全。則無為矣。至於無為。則凡有為未嘗不無。雖取天下而有之。尚猶不見其事。

若以有爲取之。取一物尙不可得。況於取天下乎。焦氏竑曰。取猶攝化也。無事卽無爲也。無爲自化。清靜自正。故曰取天下常以無事爲者。敗之。執者失之。故曰有事不足以取天下。吳氏澄曰。因言無爲無不爲之旨。故云卽古之取天下者。祇是無爲盛德。而人自歸之。必用智力而有作爲。何足以取天下哉。羅什曰。損之者無粗而不遺。遺之至於忘惡。然後無細而不去。去之至於忘善。惡者非也。善者是也。既損其非。又損其是。情欲旣斷。是非俱忘。德與道合。至於無爲矣。已雖無爲。任萬物之自爲。故無不爲也。

右第四十一章

聖人無常心。以百姓心爲心。善者吾善之。不善者吾亦善之。德善矣。信者吾信之。不信者吾亦信之。德信

矣。王弼德善德信下無矣字一本德作得聖人在天下。聖人下。一本有之字。惴惴爲天下渾其心。王弼作歛歛。河上作怵怵。釋文作慄。一本慄慄下有焉字。渾其心。傳奕

渾焉。百姓皆注其耳目。聖人皆孩之。
孩。釋文作咳。

呂氏惠卿曰。聖人先得我心之盡者也。故無常心而以百姓心爲心。猶之鑑無常形。以所應之形爲形也。聖人之視己心如此。則其視百姓心亦若是而已。則善不善信不信。亦何常哉。故善信者吾善信之。不善不信者吾亦善信之。知其心之善不善信不信無常。而以德善之。以德信之。故也。物得以生之謂德。則德者物性之所自出。而無不善不信。明矣。是以聖人之於百姓。惴惴焉而已。爲之渾其心。渾其心者。使善信者不以自異。而不善不信者不以自棄。故也。百姓皆注其耳目。惟聖人之爲視聽。聖人皆遇

之以慈待之以厚。雖不善不信。猶善而信之。知其心之無常。猶己而已矣。蘇氏轍曰。如使善善而棄不。善信信而棄不信。豈所謂常善救人。故無棄人哉。天下善惡信偽。方各自是以相非。聖人慄慄然憂之。故渾其善惡信偽。而皆以一待之。彼注其耳目以觀聖人之予奪。而吾一遇以嬰兒。於善無所喜。於惡無所疾。夫是以善者不矜。惡者不愠。而釋然皆化其爭矣。陳氏懿典曰。慄慄不自安之意。聖人無自矜自是之心。故常有不自安之意。渾其心者。渾然不分其善不善也。

右第四十二章

出生入死。生之徒十有三。死之徒十有三。人之生。動之死地。十有三。第三句韓非傳。奕皆作民之生。生而動。動皆之死地。河上本作亦十有三。

夫何故。以其生生之厚。厚下傳奕有也字。蓋聞善攝生者。陸行不避兇虎。入軍不被甲兵。被或作避。兇無所投。其角虎

無所措其爪。兵無所容其刃。夫何故。以其無死地。傳奕夫何故下亦有也字。無死地下有焉字。

天下惟生死二者。出乎生則入乎死矣。二者聽人之自擇。而人之生也。動之死地。皆去生而就死者也。

王氏弼曰。十有三。猶云十分有三分也。取生之道。全生之極。十分有三。取死之道。全死之極。亦十分有

三耳。而民生之厚。反亦無生之地焉。善攝生者。無以生為生。故無死地也。器之害者。莫甚於戈兵。獸

之害者。莫甚於兇虎。而令無所容其鋒刃。措其爪角。斯誠不以欲累其身者也。何死地之有乎。夫蚘蠶

穴於淵。鷹鷂巢於山。矰繳不能及。網罟不能施。可謂處於無死地矣。而卒以甘餌。乃入於無生之地。豈

非生生之厚乎。故物苟不以求離其本，不以欲渝其真，則如赤子之毒蟲不螫，猛獸不搏也。吳氏澄曰：出則生，入則死，出謂自無而見於有，入謂自有而歸於無。莊子云：萬物皆出於機，入於機。又曰：其出不訢，其入不詎。又云：有乎出，有乎入，皆以出爲生，入爲死。凡人不以憂思嗜欲損其內，不以風寒暑溼侵其外，及入世能遠刑誅兵爭壓溺之禍，此三者皆生之徒也。其反是者，逸貴之人內傷，勞賤之人外傷，羸悍之人不終其正命，此三者皆死之徒也。陳氏懿典曰：無死地者，蓋知道者必達於理，達於理者必明於權，明於權者不以物害己，非謂其薄之也。言察於安危，謹於禍福，莫之能害也。源案生之徒三句，諸說皆鑿，惟王氏近之而語未明，蓋徒之爲言類也。生之徒，死之徒，猶云取生之道，取死之道，此二者統言天地間人物生死常然之理也。而人之生於天地間者，往往舍其取生之道，動輒由其取死之道，此乃專言斯人不能全生之通弊也。故下句始言人之生，而上二句不言者，明其泛言物理而未切人身也。下句不復云動之死地之徒者，明其總承上文，而非並舉三事也。夫人之生既動，皆之死地，而但云十有三者，因上文兩十有三而重言之，則總數之實動之死地十有九矣。太上詞不迫切，故留言外之旨，待人自領耳。若夫後其身而身先，外其身而身存，入世出世，超然無死地者，則天下一人而已。韓非子所引民之生，生而動，動而皆之死地，雖未必原文，然義亦昭然。諸家乃謂求生而反之死者，爲鍊形衛生之徒，並上兩者爲三事，則鑿而難通矣。其論無死地者，亦多釋氏法身不壞之旨，與黃老不倫。

故並不取焉。

右第四十三章

道生之。德蓄之。物形之。勢成之。是以萬物莫不尊道而貴德。道之尊。德之貴。夫莫之命而常自然。各本或無夫字。

傳奕及開元本命作爵。故道生之。畜之。長之。育之。亭之。毒之。亭毒。河上作成熟。畢沅曰。亭成毒熟。聲義相近。養之覆之。養。傳奕作蓋。生而不有。為而不恃。長而不宰。是謂玄德。

王氏弼曰。物生而後畜。畜而後形。形而後成。何由而生。道也。何得而畜。德也。物之所以形。勢之所以成。有所本。道者物之所由也。德者物之所得也。由之乃得。故不得不尊。失之則害。故不得不貴也。李氏嘉謨曰。物自有形。以至於成勢。莫不以道德為主。然道雖尊。德雖貴。而不自尊其尊。不自貴其貴。其施於物。非有心以命於物也。莫之使令而自然生。自然畜。凡所以長育成熟。養覆。莫非自然者。由其自然。故未嘗望物之報。生不辭勞。施不求報。是謂玄德。陸氏希聲曰。稟其精。謂之生。含其熟。謂之畜。遂其形。謂之長。字其材。謂之育。權其成。謂之亭。量其用。謂之毒。保其和。謂之養。護其傷。謂之覆。此之謂大道。既生之而不執。有既為之而不矜。恃既長之而不宰。制此之謂玄德。營魄章言人同於道德。此章言道德同於人。是以其詞同而理通也。源案釋文云。亭。別也。平也。均也。調也。易師卦馬氏注。毒。治也。蓋生之畜之者。如春長之育之。而物以形者。如夏亭之毒之。而勢以成者。如秋冬勢既成。則養之覆之而已。諸家解

莫之命爲爵命。獨李氏謂道無心命物。於義爲優。呂氏惠卿曰。無名之始。道也。一而未形。物得以生者。德也。及其爲物。則特形之而已。非其所以生且畜也。已有形矣。則幼壯老死。皆其勢之必然者。然則勢出於形。形出於德。德出於道。道德本也。形勢末也。本尊而末卑。本貴而末賤。此所以能以無爲之柔弱。而勝有形之剛強。而王侯所以賓化萬物者。在此而不在彼也。然則分言之曰。道生德畜。物形勢成。至其本而言之。則生畜長育。成熟養覆。莫非道也。而道終無名焉。故不有不恃不宰。是謂玄德。張氏爾岐曰。物之形。形此道德之所生畜而已。勢之成。成此道德之所生畜而已。是以萬物莫不尊道而貴德。斯豈有所待而然哉。故道之於物。生之畜之不已也。而又長育亭毒養覆之。其爲功於物如此。然皆自然而然。生之不有也。爲之不恃也。長之不宰也。此豈可得而測乎。

右第四十四章

天下有始以爲天下母。傳奕作既得其母以知其子。河上得作既知其子復守其母。沒身不殆。塞其兌。兌釋

文云閉其門。終身不勤。開其兌。濟其事。終身不救。見小曰明。守柔曰強。兩曰字。河上皆作用其光。句上淮

是謂復歸其明。無遺身殃。是謂襲常。王弼襲作習。葉夢得

王氏弼曰。母本也。子末也。得本以知末。則不舍本以逐末也。兌者事欲之所由生也。門者事欲之所由從也。無事永逸。故終身不勤。不閉其源。故終身不救。爲治之功不在大。見大不明。見小乃明。守強不強。

守柔乃強也。焦氏竑曰：兌口也。人之有口，家之有門，皆喻物所從出。塞而閉之，藏有於無，守母者也。處者明之用，明者光之體，襲常猶言襲明，密而不露也。張氏爾岐曰：此章言體道之事，始與母指道也。子萬物也。知小守柔，即守母也。小柔即希夷微之意，形容道妙之辭。視之而不可見者，小也。能見此不可見，是曰明。守之而無可守者，柔也。能守此無可守，是曰強。暫用其外見之光，後斂歸其本然之明，無外馳不返，以遺身殃，是與常道合一者也。呂氏惠卿曰：聞道易，得道難。得道易，守道難。今我既得其母，以與心契，則非特聞之而已。故知天下之物，皆我之所出矣。非物之所出，而我常守之不失，則天下孰能以其所出而害其所自出哉。此所以歿身不殆也。塞兌閉門，守其母之謂也。心動於內，而吾縱焉，是之謂有兌。有兌則心出而交物，塞之則心不出矣。物引於物，而吾納焉，是之謂有門。有門則物入而擾心，閉之則物不入矣。內不出，外不入，雖萬物紛紜於前而不知，夫何勤之有哉。夫惟守其母，則寂然不動者也。寂然不動者，常見其心於動之微，故明矣。見而常守之，則以無形之至柔，而物莫之能勝，故強矣。既用其光，以見於動之微，復歸其明，以返於寂然，終身未嘗開兌濟事，以陷於不救，何殃之有。

右第四十五章姚氏鼐以下章使我介然有知十四字於此章之末曰施者不塞兌而遺身殃者也故可畏也介然有知則知其子以守其母矣

使我介然有知，行於大道，惟施是畏。大道甚夷，而民好徑。陳景元作甚好徑朝甚除，田甚蕪，倉甚虛，服文采，帶利劍，厭飲食，資貨有餘。傅奕作傳貨是謂盜夸，非道哉。盜夸韓非子作盜竽案古韻虞麻通用則竽夸皆協韻說文竽夸皆亏聲蓋篆文于作亏是以形近致誤畢氏玩謂

古從于字皆訓大。故爾雅之肝字。毛詩之攸芋。皆爲大義。隸文艸竹不分。韓非芋應作芋。而韓非明云一芋唱衆芋和。則本不作芋。明甚。特夸義於通章爲貫。故從河上王弼諸本。

吳氏澄曰。我者。代衆人自我也。介然。與孟子介然用之而成路同。謂倏然之頃也。施。猶論語無施勞。孟子施。施從外來之施。謂矜夸自大也。老子之學。最忌誇張。此章言不知道之人。惟務自矜。使倏然有所知而行之於大道。則必專以施爲畏而不敢爲矣。夫謙謙斂退者。大道也。其道甚平易。而人不肯行之。皇皇夸張者。小徑也。與道相反。而人皆好焉。朝甚除以下。言夸張之事也。故曰盜夸非道哉。陳氏懿典曰。謹畏不敢者爲大道。則驕矜炫耀者爲非道。明矣。謙之爲道。卑不可踰。而人不肯由也。是以外雖炫飾。而內實空虛。如朝廷雖甚美。而田疇倉廩。實荒蕪虛耗也。猶且采服劍佩以爲飾。飲食侈饜以自奉。多積無用之貨。夸爲富強。此猶盜賊之人。自夸其所有。其去惟施是畏之大道。不亦遠乎。呂氏惠卿曰。舍道而由徑。則亡本而徇末。譬夫人以食爲本。而食必出於田。田治而倉實。倉實而食足。食足而財豐。財豐而廷治。以知其本之所自出也。今不行大道。則已不得其本。而徒馳騫於其末。其與飾庭除而空倉。晦恣衣食而侈貨財者。奚以異哉。李氏嘉謨曰。行於大道。則蕩然廣大。心逸日休。故甚夷也。爭於小徑。則矜智欺人。心勞日拙。故成於盜也。世人不知此。廷甚除治。其外飾者則備矣。然田甚蕪而心不治。倉甚虛而行不修。方且盛服佩以炫人。侈貨財而無用。去道何其遠哉。源案道以不盈爲大。不盈者專務於內。有若無。實若虛也。今施且夸焉。則專務於外。無而爲有。虛而爲盈。無有窮極矣。夫民有生則有

欲則無不以相尚為高。此最難克之心。而有無窮之弊。豈不甚可畏哉。而民以不施之道。歛約而難行。顯乃見小欲速以爭。驚捷徑。豈知不矜不伐。而人莫能尚之。其道甚平。何難行之有。謂之民則蚩然無知。不知大道。則愈夸而愈小。蓋好大道者其見大。好小徑者其見小。見大則常若不足。見小則常若有餘。若是者為士。則必徇名而荒德。為庶人。則必侈末而耗本。為國家者。則必至飾外而虛內。雖淺深廣狹不同。而其為以己徇人。則一而已。特其顯者。莫若國家之侈弊。為尤易見。甚矣人心之難克。而施之可畏如此。朝甚除以下。蓋極言以曉愚迷。固非謂施之可畏。惟此一端。亦非僅借為喻也。諸家或以知行連讀。或訓施曰施為。而韓非子又作盜竽。胥非本旨。

右第四十六章

善建者不拔。善抱者不脫。子孫祭祀不輟。韓非子無兩者字。又作子孫以其世。世祭祀不輟。王弼本。孫下亦有以字。修之身。其德乃真。修之家。其德乃餘。修之鄉。其德乃長。修之邦。其德乃豐。修之天下。其德乃普。拔脫輟為韻。身真為韻。家餘為韻。鄉也。諸本避漢諱。改邦作國。今從韓非子。又河上王弼本。五修之下俱有於字。此從韓非。淮南及傳奕本。趙立堅五乃字。並作能字。又乃餘作能有餘。故以身觀身。以家觀家。以鄉觀鄉。以邦觀邦。以天下觀天下。吾何以知天下之然哉。以此。傳奕何以作奚。以王弼然也。

天下之物。建於外者。外物得而拔之。抱於外者。外物得而脫之。恃外有之固者。其固終不可恃也。若夫建德而抱一者。建之於心。抱之於內。初無建抱之形。苟我不自拔。且脫。誰得而拔脫之乎。蓋非徒固之。

於一時並且固之於後世。世人之建抱者。以智術邀結。則假於外者非己有。聖人惟修其一身之德。則足於內者無所假於外。故真也。取人人所同具者而獨全之。夫誰不在所建所抱之中乎。推而及之家國天下。亦不過此德之所餘。以長之豐之普之而已。一德之外無餘事。一真之外無餘修也。夫何故。一人之身。一家一鄉一國一天下之身是也。千萬人之性情。一身之性情是也。苟吾身之德既修。則以我之身觀人之身。彼此無異。是故家國天下之人雖不一。而彼家之身猶此家之身。觀於吾一家之人而足矣。彼國之身猶此國之身。觀於一國之人而足矣。即今之天下亦古之天下。後之天下亦今之天下。同此身即同此德。其同然之理。豈能外此而別有所知哉。不外吾身而得之矣。古之謂藏天下於天下者。用此道也。以是知舍修而言建抱者。非善建善抱者也。離身而言修者。非真修也。修之身德乃真盡之矣。呂氏惠卿曰。世之所謂修德者。或修之於家國天下。而不知其本真。乃在吾身也。德之真者。既修諸身。則推之而已。莊周以為道之真。以治身。其緒餘以為國家。其土苴以治天下。其說出於此。觀諸吾身。其所餘者已足。而無待於外。則以觀家國天下。亦若是而已矣。

右第四十七章姚鼐以善建三句別為一章

含德之厚。比於赤子。傅奕作含德之厚者比之於赤子也。毒蟲不螫。猛獸不據。攫鳥不搏。傅奕作蜂蠶不螫。王弼作蜂蠶蛇蝎不螫。骨弱筋柔而握固。握葉夢得作握。未得作握。未知牝牡之合而峻作。峻王弼作全。傅奕作腴。此從河上本。精之至也。終日號而不嗶。和之至也。號而不嗶。釋文作聲不嗶。

云聲當作噫。傅奕作號而噓不歎。彭耜云。莊子有噓不噀之語。故後人據增。知和曰常。知常曰明。益生曰
噓。字。玉篇引老子作號而不噓。又一本作不噓。陸希聲本兩至下無也字。
祥。心使氣曰強。曰強。傅奕作則強。物壯則老。是謂不道。是謂王弼作謂。不道早已。

常德不離。復歸於嬰兒。則其含德也厚矣。德者柔弱。沖和之德也。不整不據。不搏。蓋全天之人。物無害者也。握固。謂以四指握拇指也。峻。釋文云。赤子陰也。噉。聲嘶也。又啼極無聲曰噉。祥。吉凶之候也。形未完而氣自專。情未感而精自應。則常全其本然之氣。而不益生也。聲久費而和不傷。則任其自然之真。而不以心使氣也。益生由於多欲。多欲則起居動作。縱於外。飲食男女。恣於內。異於精之至者矣。心使氣由於多忿。多忿則乖張決驟。而內不能自主。張。張。張。憤興。而外不能自制。異於和之至者矣。物壯則老。為其強梁而違道也。苟守柔知和。常如赤子。則既不壯。惡乎老。既不老。惡乎已。蘇氏轍曰。老子之言道。德。每以嬰兒況之者。皆言其體也。夫嬰兒物來則不知應。誠未可以言用。然汨然無欲。其體則至矣。夫

人有心而後有形。有形而後有敵。則傷之者至矣。無心之赤子。物無與敵。曷由傷之。無執而自握。無欲而自作。是其精有餘而非心也。心動則氣傷。氣傷則號而啞。今終日號而泰然。是其心不動而氣和也。和者不以外傷內也。知和曰常。得本以應物者也。苟益生使氣。不能聽其自然。日入於剛強。而老從之。則失其赤子之性矣。呂氏惠卿曰。人之生初。德性至厚。比其長也。耳目交於外。心識受於內。而益生者日益多。則其厚者薄矣。為道者損其所益生。修性反德。德至同於初。故曰含德之厚。比於赤子。夫赤子

之爲物。特以其受冲氣之和。積而未散。而猶遇物不傷。況夫充純氣之守。而其道大同於物者。夫孰能害之。故致道之極。而復命曰常。舍德之厚。而知和亦曰常也。

右第四十八章

知者不言。言者不知。塞其兌。閉其門。挫其銳。解其紛。紛。王弼作分。別本作忿。和其光。同其塵。是謂玄同。故不可得而親。不可得而疎。不可得而利。不可得而害。不可得而貴。不可得而賤。傳奕無故字。又不可而疎害賤三句。上有三亦字。害。王弼作劓。開元本作故爲天下貴。

人之相接。或以言親。或以貌疎。塞兌閉門。無可欣厭。則不可得而親疎矣。銳以爭利。紛以取害。挫銳解紛。則不求利而害亦不至矣。光貴塵賤。和而同之。則不自貴而人亦不得賤之矣。貴在於我而不在人。則常物物而不物於物。故爲天下之至貴。塞兌閉門。言其愛身存我也。挫銳解紛。和光同塵。言其處世應物也。忘物我。混內外。則玄同乎道矣。未能玄同者。同乎此則異乎彼。同乎始未必不異乎卒。當其同也。則親之利之貴之。及其異也。則疎之害之賤之。玄同之人。無所爲同也。安有所謂異。政不得而親疎利害貴賤之也。蘇氏轍曰。凡物可得而親。則亦可得而疎。可得而貴。則亦可得而賤。體道者均覆萬物。孰爲親疎。等觀順逆。孰爲利害。不知榮辱。孰爲貴賤。情計之所不及。此所以爲天下貴也。李氏嘉謨曰。塞兌以謹其出。閉門以閑其入。挫銳以治其內。解紛以理其外。和光以抑其在己。同塵以隨其在物。如

此則無出無入。無內無外。無我無物。是謂玄同。既得其同。則之謂親而遠。謂之疎而近。謂之利而不喜。謂之害而不懼。謂之貴而不高。謂之賤而不一。故凡物不足以擬之也。

右第四十九章

以正治國。以奇用兵。以無事取天下。吾何以知天下之然哉。天下多忌諱而民彌貧。民多利器。國家滋昏。

人多技巧。奇物滋起。法令滋章。盜賊多有。正傳奕作政。無事。焦竑云一作無為。河上王弼作吾何知其然哉。以此傳奕作吾奚以知天下其然哉。以此夫。此從焦竑本。

多智巧而表事滋起。民多技巧二句。傳奕作民。故聖人云。我無為而民自化。我好靜而民自正。我無事而民自富。我無欲而民自

樸。此下傳奕有我無情而民自清句。其政悶悶。其民淳淳。其政察察。其民缺缺。悶悶一本缺缺作缺缺。淳淳作樸樸。河上作醇。

彌古譌與訛通。故為化二字。並讀如訛。王風爰兔篇為吡。同韻。靜與正韻。事與富韻。欲與樸韻。悶與淳韻。察與缺韻。禍兮福所倚。福兮禍所伏。韓非子所倚所

其極。其無正邪。河上無邪字。正復為奇。善復為妖。民之迷其日故久矣。傳奕作妖。王弼作妖。伏上並有之字。孰知

以聖人方而不割。廉而不劌。劌河上作害。薛本劌作穢。此從淮南子。直而不肆。光而不耀。耀王弼作耀。

王氏弼曰。取天下者常以無事。及其有事。不足以取天下。故以正治國。則不足以取天下。而適致以奇

用兵也。夫以道治國。崇本以息末。以正治國。立辟以攻末。本不立而未淺。民無所及。故多忌諱。欲以恥

民而民彌貧。利器欲以強國。而國愈昏。民多智慧。則巧偽生。巧偽生。則邪事起。以至法令滋章。盜賊多

有。皆舍本治末。故致此。是正者欲以息邪。而奇兵用也。聖人無為無欲。而民從之速。皆崇本以息末耳。

孰知其極其無正者言孰能知善治之所極乎。惟無可正舉。無可形名。悶悶然而天下化。是其極也。以正治國。則便復以奇用兵矣。是立善以治物。使復有詖之患也。蓋人之迷惑失道已久。不可便正治以責之。是故以方導物。令去其邪。而不以方割物。以廉清民。令去其污。而不以廉傷人。以直導物。令去其僻。而不以直激沸於物。以光鑑其所以迷。而不以光照求其隱隱。所謂大方無隅。大直若屈。明道若昧。皆崇本以息末。不攻而使復之也。吳氏澄曰。以正治國者。法制禁令正其不正。管商是也。以奇用兵者。譎而不正。孫吳是也。奇者僅能用兵而不能治國。正者但知治國而不可以取天下。惟以無爲治天下。不期服人而人自無不從之也。夫以正治國之效何如哉。忌諱謂禁網嚴密也。利便於民之器。如權衡。度量舟車網罟之屬也。技巧者造作利器之工。所謂奇技淫巧者也。八句所言二事。蓋多忌諱由於法令之彰。所以民貧於下。而或爲盜賊也。多利器由於技巧之多。所以政昏於上。而奇袤盛行也。夫整齊法利。通工足用。皆務富強。以正治國之要務。而其效如此。以之治國。猶不足也。然則所謂無事。可以取天下者何哉。無爲好靜。無欲皆無事也。旣無所事。何心致天下之嚮附。而民自然化。且正。自然富且樸。其效如此。是以之取天下而有餘也。由是二者觀之。則無事者之政。若悶悶無可喜。而民自化之。乃不澆漓而澆漓。以正治國之政。若察察有可觀。而下貧上昏。物僞人亂。而缺缺然。或得或失。相反如此。則人之行事。所謂禍者其終未必非福。所謂福者其終未必非禍。孰則知其終之所極何如哉。蓋正與不

正對正一反則爲不正之奇。正善而奇不善。斯詖禍生焉。不知無所謂正則無所謂善。而亦不至反而爲奇之詖也。常人迷昧久已不知此理。故但知以正治國之爲善。而不知無所謂正之爲正也。知此者其惟有道乎。有道者以無事爲事。則以不方爲方。不廉爲廉。不直爲直。不光爲光。是以其遇物也。圭角鋒稜。渾然不露。容隱韜晦。與物無傷。則有其善而無其弊耳。雖未嘗以此取天下。而天下可取之理在其中矣。呂氏惠卿曰。以智治國國之賊。不以智治國國之福。則有事之不足以取天下。明矣。何以知無事之足以取天下。以有事之不足取天下而知之也。自以爲正而民愈貧。國愈昏。俗愈侈。此法令所以滋彰而盜賊多也。凡以有事取天下之過也。若夫聖人無爲而民自化。則無忌諱之弊。上好靜而民自正。則無法令盜賊之害。上無事而民自富。則無利器之滋昏。上無欲而民自樸。則無技巧奇袤之尙矣。是故以無事取天下。則其政悶悶。不以察察爲快。其民亦溘溘而不澆於薄也。以智治國。以有事取天下。則其政察察而反乎悶悶。故其民亦缺缺而不全於樸也。察察缺缺。故避禍而未必免。求福而未必得。以爲正且善者。有時而爲奇且詖。禍福奇正善詖。究未知孰在者。徒令智多而難治耳。民自有知以來。迷而固執已久。柰何重之以察察之政。使不得反樸而全其性乎。故聖人反之。以無爲爲本。

右第五十章

河上本其政悶悶以下別爲一章。吳澄本合之。王弼注以正復爲奇承首句言是亦不以爲二事也。

治人事天莫若嗇

陸希聲本作治民。韓非王弼作莫如。

夫惟嗇是以蚤服

諸本作是謂。蚤服。焦竑云。一本作早復。

蚤服是謂重積德

重積

德則無不克。無不克則莫知其極。莫知其極。可以有國。黃茂材莫知其極無疊句。有國之母。可以長久。是謂深根固柢。

長生久視之道。韓非子作深其根。固其柢。河上經作蒂。

朱子曰。老子之學。謙沖儉嗇。全不肯役精神。早服是謂重積德者。言早已有所積。復養以嗇。是又加積之也。若待其已損而後養。則養之方足以補其所損。不得謂之重積矣。所以貴早服者。早覺其未損而嗇之也。姚氏鼎曰。服者。事也。嗇則時暇而力有餘。故能於事物未至而早從事。以多積其德。逮事之至而無不克矣。李氏嘉謨曰。外以治人。內以事天。皆莫若嗇。嗇者無所不嗇之謂也。謹於內。閑於外。內心不馳。外欲不動。故能早服而德日以積。積於不積。則無不勝。無不勝。則無不治。雖有國可也。人知其有國而不知其可以有國者。由其有本。本積既厚。則安知其極。此所以長久不殆也。呂氏惠卿曰。人之生也。固足於德。誠能嗇而早服之。則德日以充。非重積德而何。德之至者。物莫能傷。天下莫能勝。夫安往不克哉。無不克而莫知其極。則能物物而不物於物者也。不可以有國乎。既得其母。以知其子。既知其子。復守其母。歿身不殆。可以長久矣。精神者。生之根柢。嗇而藏之。衛而保之。則根柢深固。而生長矣。生長則視久矣。蘇氏轍曰。凡物方則割。廉則剷。直則肆。光則耀。聖人有其能而不盡其用。嗇者有而不用也。斂藏其用。至於沒身而終不試。則德重積矣。德積既厚。雖天下之剛強無不能克。則物莫測其量矣。如此而後。可以有國。以其能守母也。孟子云。存其心。養其性。所以事天。然則以嗇治人。則可以有國者。

是也。以畜事天。則深根固蒂者是也。古之至人。保其性命之常。不以外耗內。則根深而不可拔。蒂固而不可脫。雖長生久視可也。源案此章解者多齟齬。惟蘇氏以可以有國以上爲治人。深根固柢爲事天。於義較愜。蓋老子之書。上之可以明道。中之可以治身。推之可以治人。其言常通於是三者。此章首以治人事天莫若畜爲主。下文卽承畜而反復引申之。自早服重積德。至莫知其極。皆發明畜義。兼治人事天而言也。隨舉有國以明治人之用。並及深根固柢以言事天之要。蓋道之畜。而至於早服無間。德之積。而至於莫知其極。則斂舒咸宜。體用兼妙。以之有國。則可以長久。以之固己。則可以長生。惟其治人事天。無所不可。故曰莫如畜也。至蘇氏釋早服而以服人爲言。吳氏釋有國謂喻人之保有此身。則皆偏義。無取焉爾。

右第五十一章

治大國者若烹小鮮。以道蒞天下者。其鬼不神。各本無非其鬼不神也。其神不傷人。非其神不傷人也。各本

無也聖人亦不傷民。各本作亦不傷之。傳奕作亦不傷人。夫兩不相傷。則德交歸焉。各本則作故。此章字句皆從韓非子。

韓非解老篇曰。凡法令更則利害易。利害易則民變業。故事大衆而數搖之。則少成功。藏大器而數徙之。則多敗傷。烹小鮮而數撓之。則賊其澤。治大國而數變法。則民苦之。是以有道之君。貴清靜而重變法也。人處疾則貴醫。有禍則畏鬼。聖人在上。則民少欲。民少欲。則血氣治。而舉動理。舉動理。則少禍害。

夫內無疾痛之害。外無刑罰法誅之禍者。其輕恬鬼也甚。故曰以道蒞天下者。其鬼不神。言治世鬼神不與人相害也。疾人之謂鬼。傷人上刑。戮民之謂上傷民。民不犯法而上不行刑之謂上不傷人。故曰聖人亦不傷民。上不與民相害。鬼不與人相傷。是兩不相傷也。則德盡在於民矣。故曰德歸焉。言其德幽明上下交盛。而俱歸之於民也。王氏弼曰。躁則多害。靜則全真。故其國彌大。其主彌靜。然後能廣得衆心矣。若烹小鮮。不擾也。物守自然。則神無所加。神無所加。則不知神之爲神也。道治則聖人亦不傷人。聖不傷人。則不知聖之爲聖也。夫恃威網以治物者。治之衰。使不知神聖之爲神聖。則道之極矣。神聖兩不相傷。是神聖合道。交歸之民也。

右第五十二章

大國者下流。天下之交。句天下之牝。常以靜勝牡。句牝以靜爲下。舊牝牡二字連文。故魚虀謂一本作天無以靜爲下四字。吳澄則謂下牝字疑衍。案吳說得之而未盡。蓋下牝字當在牡字之下。乃倒文。非衍文也。陳象古讀牝常以靜勝。斷句牡以靜爲下。斷句亦非。首句傳突作大國者天下之下流。五句作以其靜故爲下也。司馬本作以其靜爲之下。故大國以下小國。則取小國。小國以下大國。則取大國。傳突兩則取下各有於字。河上或下以取。或下而取。大國不過欲兼畜人。小國不過欲入事人。夫兩者各得其所。欲。兩者上各本有夫字。故大者宜爲下。一本無故字。一本作爲之下。此章字句從王弼河上本。惟移牝字耳。

吳氏澄曰。大國非在人下而能下人。猶江海善下而爲衆水之交會也。小國本居人下而能下人。猶牝

此章皆言道之極貴。欲人知貴而求之也。夫尊行之可加於人，而致使居天子三公之位，則尊貴孰甚焉。美言可市，而至於百朋之錫，不若一言之贈，則寶貴孰甚焉。然則古人所以尊貴寶貴，此道者何故邪？豈不以其爲善人之寶，而求則得之，爲不善人之所保，而有罪以免邪？其爲天下至貴，不亦宜乎？吳氏澄曰：室西南隅之奧，尊者所處，故以譬道之最貴也。有道之人，命以君師之位，使爲天子三公，皆以道貴也。朝聘之享，駟馬陳於庭，先執拱璧以將命，其禮重矣。然猶不如跪而進此道之貴也。李氏嘉謨曰：賢者以道爲寶，故樂得其得，不賢者非道莫保，故樂免其罪。由其根於人心之自然，無使之者，故言行依於道，則其美可市，其尊可加乎人。苟非人心之自然，則言而不從，行而不應矣。安能若此乎？由人各根於道，故不幸而陷於不善，聖人亦何忍棄之？是以立天子，置三公，非苟富貴之也。蓋不欲遂棄人於不善，還以斯道善之而已。呂氏惠卿曰：萬物之生，未有一物不具此道者也。惟善人知其善之所自出，則得之而有無窮之富，不善人自知其不善，則雖有萬惡，亦可渙然而釋矣。夫言美可市，行尊可加，則人固無善不善，皆知美所美而尊所尊也。況有道之於人，如天地之無不覆載，非特可市可加而已，則於人之不善，何棄之有哉。

右第五十四章

爲無爲事無事，味無味，大小多少，報怨以德。圖難於其易，爲大於其細。魚坡云：一本無爾其字。天下難事

必作於易。天下大事必作於細。此句下韓非子繼以故聖人蚤從事焉。是以聖人終不為大。故能成其大。夫輕諾必寡信。多

易必多難。輕諾多易下。傳奕有兩者字。是以聖人猶難之。程俱作由難之。故終無難。句下傳奕有矣字。其安易持。其未兆易謀。其脆易

泮。諸本作判。河上作破。案泮判通用。破散不韻。此從王弼本。其微易散。為之於未有。治之於未亂。傳奕作為之乎其未治之乎其未散。合稟之木。生於

毫末。九成之臺。起於累土。千里之行。始於足下。焦竑云。九成一作九層。千里之行。一作百仞之高。為者敗之。執者失之。是以聖人

無為故無敗。河上無是以一本無聖人。無執故無失。民之從事。常於幾成而失之。慎終如始。則無敗事。傳奕幾成上有其字。無敗事下有

有矣。是以聖人欲不欲。不貴難得之貨。學不學。復衆人之所過。韓非子復下有歸字。傳奕復上有以字。以恃萬物之自然。而

不敢為。特諸本作輔。此從韓非子。

此章皆明無為而無不為之旨。無事無味之下。即次以大小多少。報怨以德者。以明我所謂無為者。非徒輓斷之見。託諸空言而已。必實能等觀大小。化怨為德。難平之情。一切順受。驗之於此。而後真能事

無事之事。味無味之味。為之未有治之未亂之後。復繼以無為無執者。以明我所謂為。非謂曲謹周密。小察機警也。其為無為。執無執。益出於衆人之所不覺。而未嘗造作有心也。味無味。則其欲也不欲矣。

事無事。則其學也不學矣。恃待也。待其自然而不敢。以有為造作之。所謂無為自化。清靜自正也。吳氏

澄曰。凡以無為而為者。老氏宗旨也。無事無味。皆演無為之旨。所以得遂其無為者。能圖其難於易之

時。為其大於細之時也。天下之事。始易而終難。始細而終大。故圖之為之於其始。則不勞心力。自能無

爲若不早圖而亟爲之。以至易者漸難。細者漸大。心力俱困。無爲其可得乎。聖人終不爲大。故能成其大者。承上文事之大小而言。心之大小也。始小之時。心固不敢自以爲大。卽已大而此心亦終不改。始終皆能自小。所以能成其大也。輕諾寡信。多易多難。四語承上文事之難易而言。心之難易也。始多易者。終必多難。是以聖人雖當始易之時。而心猶難之。始終皆不敢易。所以終無難也。其安易持六者。言圖之於其易也。合抱之木三者。言爲之於其細也。民之從事四句。又承上文終無難與終不爲之意而言也。始雖以爲難。至終而不以爲難。始雖不敢以爲大。至終而自以爲大。則事幾成而敗於終者有矣。故必慎終如始。乃可終無敗也。章首言爲無爲。章末言自然而不敢爲。此一章之意相終始也。王氏道曰。人皆有所爲。聖人亦人耳。獨無所爲乎。但衆人所爲者有爲之事。聖人所爲者無爲之道。此其所以異也。事所爲之條件也。味所爲之理趣也。劉氏概曰。欲衆人之所不欲。故曰欲不欲。不欲衆人之所欲。故曰不貴難得之貨。學衆人之所不學。故曰學不學。不學衆人之所學。故曰復衆人之所過。王氏雱曰。以輔萬物之自然而不敢爲。將各安於性命之常。而事物無所兆矣。更何脆之可泮。微之可散哉。蘇氏轍曰。世人莫不畏大而侮小。難多而易少。至於難而後圖。大而後爲。則事常不濟矣。聖人齊大小。一多少。無所不畏。無所不難。安有不濟者哉。方其未有。持而謀之足矣。及其將然。非泮而散之不可也。故爲之於未有者上也。治之於未亂者次也。聖人待之以無爲。守之以無執。故能使福自生。使禍自亡。譬如

種苗深耕而厚耘之。及秋自穰。譬如被盜。危坐而熟視之。盜將自卻。世人不知物之自然。以謂非爲不成。非執不留。故常與禍爭勝。與福生贅。卽或方事之微。猶有不知而聽其自然者。及見其幾成。而心存乎得喪。則未有不以爲敗之者矣。聖人知有爲之害。不以人助天。始終皆因其自然。故無不成者耳。呂氏惠卿曰。有爲則有事。有事則有味。爲而不爲。則事亦無事。雖反復尋繹。而何味之可言乎。人所最難忘者。怨。而吾一以德報之。則其他尙何足嬰其心哉。天下之事。大作於細。難作於易。苟有所作。吾必於易與細而先見之。旣則見圖而爲之。所謂知幾其神者也。是以終不爲大。故能成其大。蓋彼方防大於其細。而安有爲大於其大也。聖人猶難之。故終無難。以難之於其易。而不難之於其難也。持於安。謀於未兆。則是爲之於未有也。破其脆。散其微。則是治之於未亂也。苟已有而爲之。則欲其成而反敗。已亂而治之。則執愈固而反失。聖人以不爲爲之。則無爲。以不治治之。則無執。民之從事。常在於旣有之後。故至於幾成而敗之。以不知其本故也。苟知大生於小。高起於下。遠由於近。而慎之。則何敗失之有。李氏嘉謨曰。自易而往。則難者亦易。自細而行。則大者亦細。是以聖人終不爲大。而大必歸之者。由其無心也。聖人於事未至。已常若難之者。不以我必於物也。故常安其所安。而無不安。則其持無所持而易持矣。卽或偶有不安之萌動。卽自其未兆而謀之。自其脆微而破散之。故無有撓其安者。由持其安於未有。治其不安於未亂。譬如木之自生。土之漸高。行之日遠。於無爲之中。自然而爲。於無積之中。自然

而積。故累日益去。善日益積。而聖人未嘗知也。世之爲道所以難成而易壞者。由其有意於爲之執之。方其始若無所容其勤。及其終又不免於怠。皆爲之執之之咎也。使其始終不爲且執。則求其勤且不可得。而況於怠歟。焦氏竑曰。無爲無事無味者。道也是道也。不可力得。至易矣。不可目窺。至細矣。雖至易而至難者。待此以解。雖至細而至大者。待此以成。豈可以其易與細而忽之哉。學道者亦或有見於此。而又以爲大之心奪之。故易與細不常爲我有。唯聖人自始至終。爲無爲事無事。味無味。而不以世俗所謂大者分其心。故事之難者大者。遇之寂然了無留礙。而道自此全矣。此所謂成其大者也。嗟夫。此非大丈夫見理明。用心剛者。安能見。安能守。而可與輕諾多易之流道哉。

右第五十五章。河上本分其安易持以下爲一章。吳澄本合之是矣。而任臆顛倒其文。且不注明所以移置之意。一若原本如是者。殊不可訓。至姚氏輩則又割取民之從事十九字。出之章末。別爲一章。皆莫知其何意也。

古之善爲道者。非以明民。將以愚之。民之難治。以其智多。傳奕作以其多智也。故以智治國。國之賊。不以智治國。國之福。賊下福下傳奕各有也字。知此兩者。亦楷式。句上傳奕有常字。下有也字。楷式王弼作稽式。常知楷式。是謂玄德。玄德深矣。遠矣。與物反矣。乃至於大順。河上本乃上。有然後二字。

王氏弼曰。愚謂無知守真順自然也。智多謂多見巧詐蔽其樸也。以智術動民。邪心旣動。復以巧術防民之僞。民知其術防。隨而避之。思惟巧密。奸僞日滋。故曰以智治國。國之賊也。呂氏惠卿曰。古之善爲

道者。俗人昭昭。我獨若昏。俗人察察。我獨悶悶。其在己若此。則其推之於民也亦若是而已。李氏嘉謨曰。民之愚而自以爲智。徇溺於物欲而不知反。吾方示之以無爲。鎮之以素樸。猶且未悟。而況欲以智示之歟。是賊之也。倘行其所無事。而不開民之機心。機心不生。則純白備。謂之國福。不亦信乎。涑水司馬氏曰。物情莫不貴智。而有德者獨賤之。雖反於物。乃順於道。是智之所順者小。而德之所順者大也。源案此章。惟知此兩者亦楷式句。諸說皆未明。蓋古之善爲士者。雖微妙玄通。深不可識。而至於智之爲害。不智之爲福。則顯然明白而易知。但能深信固守。而不以智汨其真。則雖其體用之大全未易窺。亦可以得爲治之鵠。而不至有失矣。故曰。知此兩者亦楷式也。然誠能常常知之以爲楷式。則智故日去。瀟樸日全。其政悶悶。其民淳淳。豈但不賊已哉。雖謂之玄德亦可矣。蓋德謂之玄。則深遠與俗相反。聞者或大笑之。次亦若存若亡。今此獨能不疑其相反。而深信其可法。則雖反於世俗。乃順於大道也。順於道非玄德而何。而知之者何少哉。

右第五十六章

江海所以能爲百谷王者。以其善下之。故能爲百谷王。是以欲上民。必以言下之。欲先民。必以身後之。是以聖人處上而民不重。處前而民不害。是以天下樂推而不厭。以其不爭。故天下莫能與之爭。天下皆謂我道大似不肖。傳奕我作吾。又無道字。夫惟大。故似不肖。若肖。久矣其細也夫。一本無也夫二字。○此章字句皆從王弼本。若他本皆以聖人字在欲上。

民之上。是所以言聖人者。不無語弊也。或作以其言下之。以其身後之。是因上文以其善下之句法。而誤也。或四民字並作人。則是物我相較。而非君民相臨之定分也。或作居前而人不能害。是與下文莫能與爭之意相復。此二句傳奕作處之上處之前。河上作處民上處民前。亦皆不若弼本之協。

惟下乃大。老氏宗旨也。天下歸往之謂王。百川歸會之謂海。人知王之至尊。而不知所以尊者。由其至大。所以能成其大者。由其能下而無不容也。汝惟不矜。天下莫與汝爭能。汝惟不伐。天下莫與汝爭功。使天下忘其上。且先而爭樂推之使上。推之使先。斯道也可謂大矣。而天下顧謂其與常情不相肖似。夫大則不肖。肖則不大。江海肖乎百川。豈復成其爲江海。王者之道而肖乎一物。尙何以爲天下王哉。上章言與物相反。乃所以爲順。此章言與俗不相似。乃所以爲大。蓋一意也。金人銘云。君子知天下之不可上也。故下之。知衆人之不可先也。故後之。揚雄所謂自下者人高之。自後者人先之。董思靖所謂德下之則位上矣。德後之則身先矣。蘇子由所謂有道者未嘗欲上人先人也。但旣下之後之。則其道不得不上。且先耳。皆得老氏之意矣。○呂氏惠卿曰。有天下者。以位言之。則固上乎人也。然以孤寡不穀爲稱。而受國之垢與不祥。是何其言之下乎。論其序則固先乎人也。然迫而後動。感而後應。不得已而後起。是何其身之後乎。夫如是則處上而人以戴之爲輕矣。居前而人以從之爲利矣。上下相忘。此天下所以樂推而不厭。蓋吾之所取者。非民之所爭也。無爲之爲。天下且不見其朕。而謂之不肖。況孰與之爭乎。

右第五十七章河上以天下皆謂我道大似不肯三句屬下章姚氏歸以此三句別出

吾有三寶持而寶之河上一作我有三寶寶而持之一曰慈二曰儉三曰不敢為天下先慈故能勇儉故能廣

不敢為天下先故能成器長韓非作故能今舍其三王弼無慈且勇舍其儉且廣舍其後且先死矣死矣傳

謂入夫慈以戰則勝以戰則勝韓非作於以守則固天將救之以慈衛之傳奕下有善為士者不武善戰

者不怒善勝敵者不與一本無敵字傳奕與善用人者為之下是謂不爭之德是謂用人之力是謂配天

古之極用兵有言傳奕作用兵吾不敢為主而為客不敢進寸而退尺是謂行無行攘無臂執無兵仍此從

無敵一本二句上下互易此從傳奕蓋行兵為禍莫大於無敵無敵幾亡吾寶各本皆作輕敵幾

及傳故抗兵相加又下有則字哀者勝矣王弼

此章明德之用也蓋道以虛無為體其運而為德則以慈儉謙退為用然德為萬物之母則慈乃善之

長也與慈相反者莫如兵故專以兵明慈之為用而儉與不敢先皆在其中也首言我有三寶寶而持

之末言幾喪吾寶首尾相應以致其丁寧欲人寶之而勿失也老子著書明道救時見天下方務於剛

強而剛強莫勝於爭戰今將救其弊而返以慈儉謙退則天下必以為不適於用故即其所明者以喻

之言吾之道無施而不可雖用之以戰守亦無不勝且固者蓋慈則必儉慈則必不敢為先是即兵家

以退為進以弱為強之道其證以用兵之言者使即兵以知柔退即柔退以反於仁慈非為談兵而設

故卽繼之以禍莫大於無敵。無敵幾亡吾寶也。三寶首慈。哀者慈心之所發。故天衛之而必勝。若佳兵者不祥。未有能久勝者也。由慈而發者爲哀之則。不由慈而發者爲佳兵矣。諸本皆分爲數章。是以旨意不明。而昧者遂至以老子爲談兵之書。其失甚矣。韓非子解老曰。慈母之於弱子也。務致其福而除其禍。則思慮熟。思慮熟則事理得。事理得則必成功。必成功則其行之也不疑。不疑之謂勇。冬日之閉凍不固。則春夏之長草木也不茂。天地不能長侈長費。而況於人乎。是以智士儉用其財。則家富。聖人愛寶其神。則精盛。人君重戰其卒。則民衆。民衆則國廣。故曰儉故能廣。葉氏夢得曰。我自處也。易物無不濟也難。故卽三者推慈以爲先。而復申之以爲戰則勝。守則固。是今之所急也。天若救斯民。必使有爲慈者出而衛之。此老氏之所怛然有期於天下者歟。焦氏竑曰。不武不怒。而遂云配太古之極者。何也。蓋至爭者惟兵。故借之以明不爭之德也。用兵有言。古兵家有此言也。仍同詩云。仍執醜虜是也。王氏弼曰。士者卒之帥也。不武不怒者。後而不先。應而不唱也。不與者不與爭也。用人而不爲之下。則不盡力也。言以哀慈謙退。用之以戰。猶不須行列。不必攘臂。不用兵刃。而敵自無與之抗也。雖然。吾哀慈謙退。非欲以取強無敵於天下也。不得已而卒至於無敵。斯乃吾之所以爲大禍也。幾亡吾寶。謂三寶也。舉兵相當。哀者必相恤而不趨利避害。故必勝也。源案軍惟死戰以拒敵。故有行列攘臂執兵之事。苟無敵之可撓。則亦無列足整。無臂足攘。無兵足執矣。蓋以後爲先。以退爲進。常致人而不致於人。

則是操全勝之術。不勞力而坐致之。是謂扔無敵也。雖然。所謂無敵者。豈吾之所樂哉。蓋兵至無敵於天下。則殺人必多。乃禍莫大焉者也。前徒倒戈。血流漂杵。王者之師。而君子尙不忍言之。豈非幾亡吾寶之謂乎。是故吾之用兵。不得已而用之。以不祥視之。以喪禮處之。皆哀之至也。惟哀而後可以言勝。所謂慈則戰勝而守固。天將救之。以慈衛之者也。諸本皆作禍。莫大於輕敵。輕敵幾喪吾寶。夫輕敵必敗。身且不存。奚但寶之幾喪。是直一孫吳制勝之術耳。何足語太上慈哀之教邪。○蘇氏轍曰。勇廣先三者人之所共疾。爲衆所疾。故常近於死。以慈衛物。則物愛之如父母。雖爲之效死而不辭。故可以戰。可以守。天之將救斯人也。則開其心志。無所不慈。無所不慈。則物皆爲之衛矣。故兩敵相加。而吾出於不得已。則有哀心。哀心見而天人助之。雖欲不勝。不可得也。呂氏惠卿曰。所謂三寶。皆人之所難持者也。惟無我不爭者能持之。然惟慈故儉。惟儉故不敢爲天下先。則慈者三寶之所自出也。夫道之動。常在於迫。而其用常主於不爭。其施之於用兵之際。宜若有所不行者也。不知主逆而客順。主勞而客逸。進驕而退卑。進躁而退靜。以順待逆。逸待勞。卑待驕。靜待躁。皆非所敵。然則道之爲常。主於不爲。雖兵亦猶是矣。

右第五十八章。河上分善爲士者以下爲第二章。用兵有言以下爲第三章。吳澄姚鼐皆合爲一。今從我大似不肖數句。屬此章首。殊不相洽。吳本因而未改。今用姚說正之。

吾言甚易知甚易行。天下莫能知莫能行之。二句傳奕作而人莫能知莫之能行。言有宗事有君。傳奕作事有王。夫惟無知是以不

我知也。河上本無也字。此二句皆從淮南子。知我者希則我者貴。傳奕作則我貴矣。是以聖人被褐一作披褐懷玉。知不知上。傳奕作尚矣。不

知知病。傳奕作病矣。夫惟病病是以不病。聖人之病病也。以其病病是以不病。韓非作是以無病也。傳奕作是以不吾病。

此嘆世人之不知至道而自知其知也。老子教人柔弱謙下而已。其言至簡至易。初無難行。而世降俗

下。天下莫有知其可貴而行之者。夫何故。蓋吾所言柔弱退下之事。固自有統會宗主之旨存焉。世人

不知吾之宗主。而但見其外所言不過柔弱謙下之事。是以視為卑卑無甚高論。而莫之貴耳。故深嘆

之也。蓋大道於俗不肖。而玄德與物相反。知者自然希少。此道之所以貴乎俗而不可不知者也。使道

亦俗情俗見無異。則無足寶重矣。人既莫知。則我有三寶。惟我能持而行之。若被褐懷玉而人莫知之

也。夫中所懷之貴者。以其知夫言之宗。事之君。外所被之賤者。以其知而不知。若愚若晦。斯乃上德若

辱者也。人既不知。則必反自以為知。銜玉求售。必非至寶。以瑜為瑕。以規為璜。雖聖人與居。不能藥而

救之也。非病而何。使其一旦自知其病而病之。則所以去病者。即在此矣。前半段言人知道者之難。後

半段嘆人妄知者之多也。蓋昧於道真者。由惑於俗見。以人身言之。則不知者其病之見證。而自以其

妄見為知者。則其致病之根源也。故後以病喻之。

右第五十九章。河上分為二章。諸家因之。今案知不知以下。正足前半之意。使非後半分明指出。則知希我貴之說。未免有弊矣。

民不畏威。大威至矣。

大威上。傳奕有則無矣。

無狹其所居。

狹河上作狎。司馬作安。

無厭其所生。夫惟不厭。

吳澄作不狎。傳奕兩不厭作無

厭。

是以不厭。是以聖人自知不自見。自愛不自貴。

自知自愛下。傳奕有兩而字。

故去彼取此。

焦氏竑曰。威畏古通用。人不畏其所當畏。則大可畏者至矣。下文皆畏其所當畏之事。呂氏惠卿曰。民不純於道而惟知識之尚。故生生厚。生生厚故輕死。輕死故不畏威。民至於不畏威。則無所不爲。此天之所由以明威而大降其虐也。李氏嘉謨曰。知道者之遇物。隨所遇而安。故不狎其所居。不厭其所生。我惟不自厭。故生亦莫吾厭。由其自知而不自見。其所知。自愛而不自貴。其所愛。故也。使有自見自貴之心。則必狹其所居。厭其所生。而不能一日安矣。陳氏懿典曰。天下有亡生趨死之道。是大威也。不畏則入畏矣。故身之所居者。必不敢狹小之。而有過分之望。身所賴以爲生者。必盡心力而不敢厭怠。以爲勞也。夫惟安居而不厭其生。是以安身而不厭其道。自知不自見者。自檢飭盡分。而不誇張其所有也。自知則知所愛矣。不自見則無所矜貴矣。故去彼之狹且厭。而取己之所安也。老子書大抵戒人之夸大外慕也。源案人不知威之可畏者。由於有欲之可貪。而外之有所貪。由於內之有所厭。所居以境言。如貧富貴賤窮通之類。所生以身之受用者言。如勞逸榮辱苦樂之類。凡人以所生所居不若人爲恥。是故居貧不居富。則狹之。居賤不居貴。則狹之。居閹約不居聲華顯望。則狹之。狹之則必厭之。厭之則必歆之。厭勞則慕逸。厭辱則思榮。厭憂患則思安樂。歆之一念熾於前。而不知可畏之大威已隨其

後蓋患得患失無所不至則求榮者適足以取辱求生者反以之死自厭而後天人亦厭之矣若夫不狹則不厭不自厭誰得而厭之夫民之與聖人其高下固不可相提而論然其理未嘗不同狹其所居必自大聖人隨遇而安則以自知爲至足未嘗急於自見以夸其大也厭其所生者必求所以貴其生聖人寶真抱樸則以不殆辱爲自愛未嘗別求所貴以厚其生也夫是以無所歆者自無所厭無所厭者自無所畏所無者所去也所有者所取也諸家釋此多涉禪宗吳澄改不厭爲不狎說雖明切又與聖人自知不自見二語不貫胥未得本旨也

右第六十章

勇於敢則殺勇於不敢則活此兩者或利或害天之所惡孰知其故是以聖人猶難之天之道不爭而善勝不言而善應不召而自來繚然而善謀繚河上作縹梁武作坦縹縹坦三天網恢恢疏而不失河上作勿失民不畏死傳奕民下有常字奈何以死懼之傳奕作如之何其以死懼之若使民常畏死而爲奇者吾得執而殺之傳奕無執字一本得豈孰敢常有司殺者殺而代司殺者殺是代大匠斲夫代大匠斲者希不傷其手矣常有司殺者六句河上王弼開元陳象古諸本各不同此本前四句從傳奕末兩句從淮南子

王氏弼曰兩者俱勇因所施者異而利害遂不同故曰或利或害也言誰能知天所惡之意何故邪其唯聖人乎聖人之明猶難於勇敢況無聖人之明而欲行之也李氏贇曰勝以不爭應以不言象以不

召謀以不計。正天之疏而不失處。若爭而後勝。雖疏必有失矣。張氏耒曰。夫人之生。徇欲趨利而死者大半矣。則其於死實未嘗知所畏矣。而世之馭物者。欲物之畏。不過示之以死。亦惑矣。苟畏死邪。則吾取爲奇者而殺之。宜民之不復爲奇也。天下未嘗無刑。而爲奇者不止。則死之不足懼物。明矣。萬物自生自死。冥冥中有司之者。苟不循其常理。而操刑政死生之柄。驅一世使從我。未有不反自害者也。張氏爾岐曰。司殺者法也。聖人立法本乎天討。不可以私意輕重於其間。此爲當時廢法任情者警也。蘇氏轍曰。勇於敢則死。勇於不敢則生。此物理之常也。然而敢者或以得生。不敢者或不免死。世常僥倖其或然而忽其常理。夫天道之遠。其有一或然者。孰知其好惡之所從來哉。故雖聖人猶以常爲正。其於勇敢未嘗不難之。世以耳目觀天。見其一曲而不睹其大全。有以善而得禍。惡而得福者。未有不疑天網之疏而多失也。惟能要其始終而盡其變化。然後知其恢恢廣大。雖疎而不失也。政煩刑重。民無所措手足。則常不畏死。雖以死懼之無益也。民安於政。故樂生畏死。然後執其詭異亂羣者而殺之。孰敢不服哉。司殺者天也。方世之治。而有詭異亂羣之人。恣行於其間。則天之所棄也。而吾殺之。則是天殺之而非我也。非天之所殺而吾自殺之。是代司殺者殺也。代大匠斲則傷其手矣。代司殺者殺則及其身矣。源案此老子憫時救世之心也。見當世勇於用刑。故戒之曰。人之用勇不可不慎也。有勇於敢者。則常主於必殺。有勇於不敢者。則常主於活人。此兩者其用勇則同。而一利一害分焉。不可不審也。

何則人之勇於敢殺者豈不自以為順天之所惡故毅然行之而無難然天意深矣遠矣孰知其果為天所惡之人乎是以雖奉天討之聖人而於刑誅之際猶兢兢然不敢輕易之何者蓋天之生萬物猶父母之生衆子生之而不欲殺之者其本心及其自趨於死雖欲宥之而不可得則亦傾者覆之此所以恢恢疎闊而自無漏網之人也何待人之代執其咎哉是以聖人誅罰一聽諸天之自然而未嘗以己意與之則雖極好生之德而未嘗失有罪之誅是以網漏吞舟之魚而為奇者吾奉天討以殺之孰敢不畏所謂刑一人而天下懲誅四罪而天下服蓋我不敢者人亦不敢之也苟其不然天以恢恢之網而吾以察察之網乘之法網愈密掛網愈衆而人之不畏死者愈甚何則我敢者人亦敢之也奉天者聽命而代天者專權敢與不敢或利或害可不慎乎明太祖讀民不畏死奈何以死懼之之語惻然有感乃罷極刑而囚役之不逾年而心減仁人之言其利溥哉

右第六十一章舊分二章吳氏澄曰此當為一章前言天之不可知而不輕殺後言民之不可懼而不輕殺故前舉天之疎而不失者以示教後舉人之欲代天殺者以示戒也

民之饑傳奕下有者字以其上食稅之多傳奕下有也字是以饑民之難治傳奕下有者字以其上之有為傳奕下有也字是以難治民

之輕死傳奕下有者字以其生生之厚也傳奕作以其上求生之厚也是以輕死夫惟夫一本無夫字無以生為者傳奕生為下有貴字是賢於

貴生焉各本無焉字傳奕焉作也此二句從淮南子

此承上章民不畏死奈何以死懼之而申言也稅租也王氏弼曰此言民之所以僻治之所以亂皆由

上不由下也。民從上也。呂氏惠卿曰：聖人在上，無事而民自富，無欲而民自樸。則至於食稅之多而饑者無有也。無為而民自化，好靜而民自正。則至於有為而難治者無有也。尚安有生生之厚而至於輕死者乎？張氏爾岐曰：夫惟無以生為者，在上則不多取多事以病其下，在下不敢扞網為奸以累其上。是賢於貴生矣。源案：我自厚其生，則人亦各欲厚其生。人各欲厚其生而不得，夫安得不輕死乎？則是民之輕棄其生，由於生生之厚，而民之厚生，由於上之自厚其生。有以誘之而又奪之也，則無以生為者，其賢於貴生可知矣。末語老氏宗旨，故因言俗弊而遂及之，而其意則深遠矣。

右第六十二章

人之生也柔弱，其死也堅強。草木之生也柔弱，其死也枯槁。草木王弼河上有萬物二字，柔弱一作柔脆。故堅強者死之徒，柔

弱者生之徒。傳奕兩徒下有也字。是以兵強則不勝，木強則兵勝。河上作木強則共，此從王弼勝兵為韻，言木強被伐也。強大強，又下有

故處下柔弱處上。

呂氏惠卿曰：道之為物，無形而不爭，則天下之至柔，而人莫之喻也。故以有形喻之，人與草木之形體，皆以堅強而死，柔弱而生。況欲體無形之道者，而不致其柔弱，其可得乎？是柔弱勝剛強之理，非但兵驕則敗，木強則伐為然也。天以清虛在上，地以堅實在下，臣以有為事上，君以無為任下，凡物之理莫不然也。然則體道之貴柔明矣。蘇氏轍曰：沖氣在焉，則體無堅強之病；至理在焉，則事無堅強之累。物

之常理。精者在。上。粗者在。下。其精必柔弱。其粗必強大也。吳氏澄曰。末二句即承上兩句而言之。蓋兵強者爲人所勝。是不若以弱勝者之處。人上也。木強者近根之榦。是不若枝條之處上也。推此則知矜己凌人者必蹶。其貴高而柔弱者爲衆所推戴矣。李氏嘉謨曰。柔弱雖非卽道。而近於無爲。剛強雖未離乎道。而涉於有爲。無爲則去道不遠。有爲則吉凶悔吝隨之。益遠於道矣。源案老子書將終。故對舉柔弱剛強之得失。而下三章皆申之。

右第六十三章

天之道其猶張弓乎。

乎傳奕作者歟

高者抑之。下者舉之。有餘者損之。不足者補之。

與之作

天之道損有餘而補不足。

人之道則不然。損不足而奉有餘。孰能以有餘奉天下。惟有道者。

二句各本大同小異。傳奕作孰能損有餘而奉不足於天下者。其唯有道

乎者

是以聖人爲而不恃。功成而不處。

傳奕作不居

其不欲見賢邪。

王弼無邪字

此承上章柔弱處下強大處上之意。而舉天道以申之也。老子云。將欲翕之。必固張之。則張者是剛強之意也。天之道惡盈而好謙。猶弓之張者。不久則廢弛。弛者有時而張。是故凡高者必至於自抑。而自下者必舉。有餘者必至於自損。而自屈者必伸。天之於物每每然也。人則不然。損天下之不足。而奉一己之有餘。失天意矣。有道之聖人。雖有至賢之行。而不欲以自見。此爲道日損。必至於損之又損也。蘇氏轍曰。張弓上筋弛弓上角。故以況天之抑高舉下。天無私故。均人有私故。不均。有道者瞻足萬物而

辭既以爲人己愈有。既以與人己愈多。非有道者無以堪此。爲而恃。成而處。則賢見於世。賢見於世。則是以有餘自奉也。呂氏惠卿曰。天之道非故以抑高而舉下也。無爲則無私。無私則均。是故任物之自然。有餘者不得不抑而損。不足者不得不舉而益。所謂滿招損謙受益。時乃天道也。人之道不能無爲。不能無爲。則不能無求。不能無求。則至於損人以益己矣。惟有道者知未始有物。凡有爲之功名。皆我所餘。而天下之所不足而爭之者。故損之以奉天下而不有也。吳氏澄曰。抑之舉之二句。言張弓。損之補之二句。言天道。陸氏希聲曰。陽升極天則降。陰降極地則升。此則抑高舉下。張弓之象也。天道盈虛。一章七閏。損日之有餘。補月之不足。人道則不然。損不足之民而奉有餘之君。孰能法天道以爲人道者乎。在易損下益上曰損。損上益下曰益。以下爲本也。

右第六十四章

天下莫柔弱於水。河上作柔弱。莫過於水。而攻堅強者莫之能先。王弼先其無以易之。傳奕作以其。無以易之也。柔之勝剛。弱之

勝強。一本上有故字。中無兩之字。天下莫不知莫能行。傳奕作莫不知。而莫之能行。是以聖人云。河上作故聖人云。傳能受國之垢。

是爲社稷主。能受國之不祥。是爲天下王。各本無兩能字。傳奕主上王上有兩之字。河上是爲作是。謂此並從淮南子。正言若反。傳奕有也字。

柔弱勝剛強。老子屢言之。而人多易視之者。故知之而莫能行。乃於書之將終。復舉而言曰。吾之此言。慎毋視爲易易也。蓋凡有血氣。皆有爭心。平日非不知柔弱之爲善。及至垢辱橫逆之加。不覺勃然。其

剛強之忽發而不能堪矣。夫山藪藏疾，川澤納污，國君含垢，今挾其才力而常爲名尸智主，事任謀府，爭心所累，是惡能保其爲侯王乎？此言若反乎俗情而實合乎正道，俗以受垢受不祥爲殃，故也。下章和大怨有餘怨，亦承此意而申之耳。

右第六十五章

吳氏澄姚氏鼎以正言若反四字屬下章之首謂反與善韻今此四字正承上文聖人云三字而言也故不取

和大怨

傳奕下有者必二字

有餘怨安可以爲善是以聖人執左契而不責於人故有德司契

有德上河上王弼無故字此從傳奕本

無德司徹天道無親常與善人

承上章受垢受不祥而申言無我不爭之難也。蓋柔弱施於平時易，施於臨事難，以受睚眦之小怨易，以受橫逆之大怨難。學道者苟於大怨強自和之而尙有藏怒宿怨之存於中，即使終不發作而纖芥未去，與邱山同安可遽語上善若水之道哉？蓋所謂德善者，善者吾善之，不善者吾亦善之，則聖人之執左契者是已。券契有二，我執其左，但有執右以來責取者，吾卽以財物與之而未嘗有所責取於人。聖人之於物，順應無心，來無不受，亦若是而已。來者不見其爲怨，與者不自以爲德，德怨兩泯，物我渾化，是則真能體無我不爭之德者矣。彼和怨者烏足以言之。蓋德之未至，如彼主徹法者然，令八家合作，計畝均分，自以爲至平而不知多寡必較，錙銖不讓，強以齊人之不齊而適使之爭耳。和大怨者但知情恕理遺，不至已甚，而是非之見終明，物我之情不化，何以異是哉？然則善人不常受天下之虧乎？

曰善人雖常受虧於人而天不虧之也。皇天無親，惟德是輔。德無常師，主善為師。安有善人不矜勝而天遂不助之者哉。然則柔之勝剛，弱之勝強，昭然明矣。但非定識不能知，非定力不能守耳。故曰無以易之也。

右第六十六章

小國寡民，使有什伯人之器而不用。傳奕作使民有什伯之器而不用也。此從河上。使民重死而不遠徙。葉夢得無此八字。雖有舟車，弭

與無所乘之。雖有甲兵，無所陳之。使民復結繩而用之。史記傳奕下有至治之極，民各六字。甘其食，美其服，安其民，樂其俗。

傳奕作安其俗，樂其業。今按俗與服韻，傳本非也。鄰國相望，雞犬之音，相聞。民至老死，不相往來。傳奕民上有使字，相下有與字。○又諸民字或避唐

諱改人。

蘇氏轍曰：老子生於衰周，文勝俗弊，將以無為救之。故於書之將終，言其所志，願得小國寡民以試焉。而不可得耳。內足則外無所慕，故以其所有為美，以其所處為樂，而不復求也。姚氏鼐曰：上古建國多而小，後世建國少而大。國大人衆，雖欲返上古之治而不可得也。故老子欲小其國而寡其民。吳氏澄曰：舟車甲兵，非一人可獨用，謂什伯人之器也。民淳事簡，則書契亦可不用。不但不用什伯之器而已。以所產之衣食為甘且美，以居之土俗為安且樂，則不肯遠徙矣。雖至近而老死不相往來，則又不但不遠徙而已也。王氏雱曰：國小民寡，則人淳厚；國大民衆，則利害相摩，巧偽日生。觀都邑與聚落之民。

質詐殊俗。則其驗也。無道之世。未勝本衰。利欲在乎厚生。而貪求生於外慕。於是車轍足迹交乎四方矣。考論語孟子之終篇。皆稱堯舜禹湯聖人之事。蓋以舉其書而加之政。亦若是也。老子抱太上之德。以處末世。故其志亦如此耳。呂氏惠卿曰。莊周稱至德之世。而歷數之曰。昔者大庭氏容成氏。以至於祝融伏羲神農氏。當是時也。民結繩而用之。甘其食。美其服。安其居。樂其俗。鄰國相望。雞犬之音相聞。民至老死而不相往來。則若此者。非特老子之言也。古固有是道也。然書起於唐虞。而老子欲反太古之治。世之去太古遠矣。其遂可盡復乎。曰。未可也。未可而言之何也。夫衰周文弊。淳質亡喪。盡矣。非大道不足使人反性命之情。言道而不及其世。不足以知大道之已試。此其所以必反太古之治也。禮至於兼三王。樂至於備六代。而不以玄水措醴酒之下。嚙管加疏越之上者。使人知禮樂之不得已者。如彼。而所當反本者如此也。故聞古有什器不用。舟車甲兵不陳。則舉大事用大衆。非得已也。聞其民結繩而治。老死不相往來。則煩文倦令。輪蹄輻輳。非得已也。其尙肯煩事爲以深治人之過乎。欲天下不安平泰。不可得也。苟歿而不言。猶屏玄水。徹疎越。其孰知禮之儉樂之節。爲反本復始之意乎。漢承秦後。卒以無爲清靜。幾致刑措。然則至人之言。豈小補哉。

右第六十七章

信言不美。美言不信。善者不辯。辯者不善。

傅奕作善言辯言。

知者不博。博者不知。聖人不積。

傅奕作無積。

既以爲人。己

愈有。既以與人。己愈多。天之道。利而不害。聖人之道。爲而不爭。

王氏弼曰。信言不美。實在質也。善者不辯。本在樸也。知者不博。極在一也。己愈有者。物所尊也。己愈多者。物所歸也。利而不害。動常生成之也。吳氏澄曰。此書卒章其言如此。故其和平簡約。不辯不博。蓋實善實知。故皆真實之言。而不虛飾以爲美也。不積謂虛而無有也。虛而無有。故所應不窮。以積爲有。則所應有限。豈能愈有愈多哉。莊子稱老子之學。云以有積爲不足。無藏也。故有餘。此之謂也。利者害之對。爲者爭之端。以不利利之。是以不害。以不爲爲之。是以不爭。不爭者無我也。無我者以其爲而無爲也。焦氏竑曰。老子之書。使人得以受而味焉。則近乎美。窮萬物之理而無不至。則近乎辯。且博。然不知其信而不美。善而不辯。知而不博者存。何也。則以五千言所言。皆不積之道也。不積者心無所係。則言而無言矣。故非不爲人也。而未嘗分己之有。非不予人也。而未嘗損己之多。斯何惡於辯。且博哉。苟第執其意見。以與天下爭。則多言數窮者流。非天道也。學者於此。了心而忘言焉。則於全書思過半矣。

右第六十八章姚氏釁分信言不美六句爲一章。聖人不積三句爲一章。天之道三句爲一章。今不取。

附錄

說苑曰。常縱有疾。老子往問焉。曰。先生疾甚矣。無遺可以語弟子者乎。常縱曰。子雖不問。吾將語子。過故鄉而下車。子知之乎。老子曰。非謂其不忘故邪。過喬木而趨。子知之乎。老子曰。非謂敬其老邪。張其口而示老子曰。吾舌存乎。老子曰。然。吾齒存乎。老子曰。已矣。子知之乎。老子曰。豈非柔存而剛亡邪。常縱曰。噫。天下之事盡於此矣。吾何以復語子哉。高士傳作商容。世說註云。商容老子師。

莊子曰。老聃死。秦失弔之。三號而出。弟子曰。非夫子友邪。曰。然。然則弔焉若此可乎。曰。然。始也。吾以爲其人也。而今非也。向吾入而弔焉。有老者哭之如哭其子。少者哭之如哭其母。彼其所以會之。必有不蘄言而言。不蘄哭而哭者。是遁天倍情。忘其所受。古者謂之遁天之刑。適來。夫子時也。適去。夫子順也。安時而處順。哀樂不能入也。古者謂是帝之懸解。指窮於爲薪。火傳也。不知其盡也。

史記孔子世家曰。魯南宮敬叔言魯君曰。請與孔子適周。魯君與之一乘車兩馬。一豎子。俱適周。問禮。蓋見老子云。辭去。而老子送之曰。吾聞富貴者送人以財。仁人者送人以言。吾不能富貴。竊仁人之號。送子以言。曰。聰明深察。而近於死者。好議人者也。博辨廣大。危其身者。發人之惡者也。爲人子者。毋以有己。爲

人臣者毋以有己。孔子自周反於魯。弟子稍益進焉。

史記孔子弟子列傳曰。孔子之所嚴事。於周則老子。於衛蘧伯玉。於齊晏平仲。於楚老萊子。於鄭子產。於魯孟公綽。

禮記曾子問曰。曾子問曰。古者師行。必以遷廟主行乎。孔子曰。天子巡守。以遷廟主行。載於齊車。言必有尊也。今也取七廟之主以行。則失之矣。當七廟五廟無虛主。虛主者。惟天子崩。諸侯薨。與去其國。與祫祭於主。爲無主耳。吾聞諸老聃曰。天子崩。諸侯薨。則祝取羣廟之主。而藏諸祖廟。禮也。卒哭成事。而後主各反其廟。君去其國。太宰取羣廟之主。以從禮也。祫祭於祖。則祝迎四廟之主。主出廟入廟。必蹕。老聃云。又曰。葬引至於壝。日有食之。則有變乎。且不乎。孔子曰。昔者吾從老聃。助葬於巷黨。及壝。日有食之。老聃曰。丘止柩就道右。止哭以聽變。旣明反而後行。曰禮也。反葬而丘問之曰。夫柩不可以反者也。日有食之。不知其己之遲速。則豈如行哉。老聃曰。諸侯朝天子。見日而行。逮日而舍奠。大夫士使。見日而行。逮日而舍。夫柩不早出。不莫宿。見星而行者。唯罪人與奔父母之喪者乎。日有食之。安知其不見星也。且君子行禮。不以人之親。店患。吾聞諸老聃云。

又曰。子夏問曰。三年之喪。卒哭。金革之事無辟也者。禮與。初有司與。孔子曰。夏后氏三年之喪。旣殯而致事。殷人旣葬而致事。記曰。君子不奪人之親。亦不可奪親也。此之謂乎。子夏曰。金革之事無辟也者。非歟。

孔子曰吾聞諸老聃曰昔者魯公伯禽有爲爲之也今以三年之喪從其利者吾弗知也

莊子曰孔子西藏書於周室子路謀曰由聞周之徵史有老聃者免而歸居夫子欲藏書則試往因焉孔子曰善往見老聃

又曰孔子行年五十有一而不聞道乃南之沛見老聃老聃曰子來乎吾聞子北方之賢者也子亦得道乎

又曰老子見孔子徒弟子五人問曰前爲誰對曰子路勇且多力其次子貢爲智曾子爲孝顏回爲仁子張爲武老子歎曰吾聞南方有鳥名爲鳳鳳之所居也積石千里河水出下鳳鳥居止天爲生食其樹名瓊枝高百仞以瓊琳琅玕爲寶天又爲生離米一人三頭遞起以伺琅玕鳳鳥之文戴聖嬰仁左智右賢

御覽引

又曰孔子讀春秋老聃踞竈觚而聽御覽引

呂氏春秋曰荆人有遺弓者而不肯索曰荆人遺之荆人得之又何索焉孔子聞之曰去其荆而可矣老聃聞之曰去其人而可矣

說苑敬慎篇曰老子曰得其所利必慮其所害樂其所成必顧其所敗人爲善者天報以福人爲不善者天報以禍也故曰禍兮福所倚福兮禍所伏也戒之慎之君子不務何以備之夫上知天則不失時下知

地則不失財。日夜慎之。則無災害。

荀子曰。孔子觀周。入后稷之廟。右陛之前。有金人焉。參緘其口。而銘其背。曰。古之慎言人也。戒之哉。戒之哉。無多言。多言多敗。無多事。多事多患。安樂必戒。無行所悔。勿謂何傷。其禍將長。勿謂何害。其禍將大。勿謂何殘。其禍將然。勿謂不聞。神將伺人。焰焰不絕。炎炎若何。涓涓不壅。終為江河。綿綿不絕。或為網羅。毫末不札。將尋斧柯。誠能慎之。福之根也。曰。是何傷。禍之門也。彊梁者不得其死。好勝者必遇其敵。盜憎主。人民怨其上。君子知天下之不可上也。故下之。知衆人之不可先也。故後之。溫恭慎德。使人慕之。執雌守下。人莫踰之。人皆趨彼。我獨守此。人皆惑之。我獨不徙。內藏我智。不示人技。我雖尊高。人弗我害。誰能於此。江海雖左。長於百川。以其卑也。天道無親。常與善人。戒之哉。孔子既讀斯文也。顧謂弟子曰。小子識之。此言實而中。情而信。王應麟曰。皇覽云。武王問師尚父曰。五帝之誠。可得聞乎。尚父曰。黃帝之誠曰。吾之

帝銘六篇。蔡邕銘論。黃帝有巾机之法。皇覽撰集於魏文帝時。漢七略之書。猶存。金人銘。蓋六篇之一也。何孟春曰。銘詞中如綿綿不絕。或成網羅。毫末不札。將尋斧柯。四語。則汲冢周書亦有之。盜憎主人。民怨其上。則左傳伯宗之妻亦述之。可見其為古語矣。至其大旨。則與老子書合。如云。誠能慎之。福之根。謂是

何傷。禍之門者。即老子所謂禍兮福所倚。福兮禍所伏也。其云。彊梁者不得其死。即老子所謂堅彊者死之徒也。其云。知天下之不可上也。故下之。知衆人之不可先也。故後之。即老子所謂欲上民。必以其下之。欲先民。必以其後之也。然老子欲上欲下之心。則視此為私矣。其云。執雌守下。人莫踰之者。即老子所謂後其身而身先。外其身而身存。其云。人皆趨彼。我獨守此者。即老子所謂知雄守雌。其雌知其榮。守其辱也。其云。人皆惑之。我獨不徙者。即老子所謂處衆人之所惡。衆人皆有餘。而我獨若遺也。其云。內藏我智。不示人技者。即老子所謂和其光。同其塵。衆人昭昭。我獨昏昏。衆人察察。我獨悶悶也。其云。江海雖左。長於百川。以其卑也。即老子所謂江海所以為百谷王者。以其善下之。故能為百谷王。故君子居則貴左也。其

云天道無親，常與善人者，則老子亦有是語也。可見周柱史之書，不爲無本，而黃老並稱之由，亦可以此徵其源流矣。



老子本義
附錄

跋

桐廬袁 昶

壹公師作勸學篇。極詆老子。意謂此後世張禹孔光胡廣馮道之徒所託足。陽盜仁人之名。而陰實賊亂天下。俾道揆法守。墮壞於冥冥之中。故疾之已甚耳。孔子惡鄉愿。然鄉愿之曲學阿世。上之如李斯公孫宏。或荀卿之叛徒。或自詭於儒術。其始皆有所挾。下之若近世不學無術和光同塵之鄉愿。唯阿浮湛害世教。當入之佞幸傳中。皆不得自託於老。老子正言若反。以正治國。以奇用兵。以深根寧極爲體。以藏器待時爲用。雖異於六藝正學乎。然誼指深遠。莫有能得其懸解者。劉知幾僞河上公注其傳者。若嚴君平王弼傅奕之徒。皆无繇觀其深。古今心知其意者。史公評論六家要指。蘭臺敍次道家者流。寥寥數言耳。西漢開國風氣。老詘儒。孝武太初以後。六經漸明。儒詘老。偏得聃之道者。太宗孝文帝留侯蓋公世祖光武帝以致治。汲黯以直言。兩疏以知幾。不得之者。揚雄本詞章家。非道家。了不得其作用。墨墨處世而已。似之而非也。伊尹太公管仲計然皆道家。善能因斲而爲福。轉敗而爲功。金版六弢。有取人國治天下之術。爲儒家拘牽。所不肯言。外修清靜冲慎之本政。中含堅忍蟄伏凝固縱橫之用。斂之深深。息之綿綿。審幾一發。當者百碎。迴眎宰制之主。專氣致柔。冲兮萬物之宗。固返一不見其有爲之轡迹也。故未流爲法

家為陰符兵家。然形骸之外。去之抑遠。老子之道。常居陰而治陽。處靜而觀動。養晦而治明。體柔以御剛。

與莊列之澡練神明。彰搖出世者。指絕殊異。故曰人君南面之術也。箋注無慮數十百家。明祖注本未見。然明祖用老而

流為申韓之毒。正誤解聖人不仁。芻狗萬物句耳。罕有擊其深者。惟邵堯夫言老子得易之體。朱子語類論老子。若因者君之綱

等數條。具見本原。為能明其道術。與莊釋若冰炭之不相入。吳草廬張蒿庵亦有微指。近儒俞曲園解老

長於訓詁句讀。道咸間。迺有邵陽魏氏為之本誼。裁翦諸家。下以己意。左右采獲。所得較多。予既因楊仁

山之請。刊焦氏老子翼於經藏中。曩復倩方君孝閔。迻錄魏氏注。己亥春刊始竣。不佞北來匆匆。未及詳

辭譎斂。自惟陸湛避世。居官錄錄。未得一效。而折廷諍之用焉。敢謬宗苦縣。遠壺公師之正論。第悼注家

心知其意者實渺。是注頗有疏導盪滌之功。不可沒也。乃書其校刻緣起云爾。庚子四月晦。

此篇因難已失。庚子冬重入京。始于燬宅瓦礫中尋得兩紙。係先人手點改者。今謹補刊。并依原點加六圈焉。壬寅十月不孝梁肅敬識。

中華民國二十三年十一月初版
中華民國二十四年四月三版

(24153)

國學基本叢書
老子本義 一冊

每冊定價大洋貳角伍分

外埠酌加運費匯費

撰述者

魏

源

發行人

王

雲

五

印刷所

商

務

印書館

發行所

商

務

印書館

上海及各地

上海河南路

上海河南路

370135

國立中央圖書館
藏書



中華民國壹零肆年三月廿肆日贈送

國家圖書館



004752516

